

Basef Ifimba Fagafe'ma Esis Hibrui

Basef bandafi fagafe'ma esis Hibrui

1:1-3 Basef Godi fataga fandawalap alihifa Jisas Kraiss, Nogamana ananinai atona, anen nagape na'amba atin si'i Ahamana Godi

1:4-2:18 Jisas nikila' amom ensel hiami

3:1-4:13 Jisas nikila' Moses

4:14-6:20 Jisas anen Dembinai ape'inai nanda' maol nondolalima Godi

7:1-28 Jisas Dembinai nanda' maol nondolalima Godi nikila' Melkisedek

8:1-9:28 Jisas anen Dembinai nanda' maol nondolalima Godi nape la'afen numafi basef dambaifi Godi nagala' lapafi. Ea' esimbel ananibeli balo bewa' banaga basef ifimba

11:1-12:29 Hiasi sagahapifa Godi sihimba'mapa waf bu'wafi ma mogailaf

13:1-25 Waf bu'wafi apa' mogailafi ma monda' okom Godi bo'oma apa'

Dei' Malogol Nogamana Godi na'ipapa basef

1 ¹Fowa' gani God na'ipa akusapa bafasapa ape'isi na'amba, na'ipas nimaguf atef atin na'ipa amom profeta ufiawa hiawai mawalapas ma'ipasas. ^a ²Apa' dei' nogota ata'e a si'i nogota atamba anaf tigi' togatagai endilisi, nawalapa basef na'ipapa malogol Nogamana ananinai. God nandandepana ma nemaf akutaifi anen a' nope dembinaima hiahaom hiami ma itap ana'e moloma esis amam nematawa wapani. Anen atona nofa'as numafias. Fowa' gani God na'i aho' ma nogamana ananinai nanda' hiahaom hiami ambagof fagapaumi maloma ambagof

a 1:1 Sam 2:8; Mt 21:38; Jo 1:3

akami magape ilif itapi hi'alam mataga magape.^b ³Nogamana atona nogogala'i lu'unai Godi nahihimapa a'owa', anen ea' na'amba atin si'i God endilisi. Basef ananifi banagafi ifimba atif nowa' banaga hiahaom amamba hiami hi'alam. Anen atona nanda' apa' epes mataga be'lepa hilili' nanda'asa ea', dei' nape lagol banagagili Godi wa'ol, God banagonai nugumafi hiahaom hiamii.^c

⁴Isimba atis dei' nataga Dembinai endilisi nikila' amom ensel hiami hi'alam. Dei' main, agol agalemba nogofa'agola ahamanai gikila' agof amom enseli ea' fasifasigil a'owa'.^d ⁵Dei' main, fowa' God ina na'ipa anona ensel ananinai na'i,

“Ina' nogame ae'inai, ae' Ahamena ine'iwai endilisi,” owa'. Basef ifimba na'ipa Nogamana ananinai atona.

Ea' God na'ias wapani na'i,

“Ae' atiasi etaga ahamana ananiwai, anen nope Nogame ae'anai.”

God ina na'ipa anona ensela basef ifimba, owa'atin. Na'ipa nogamana ananinai atona.^e

⁶Afamba God naga'ipa nogamana ananinai nape nagali'ma hiahaom hiamii, na'ias wapani na'i,

“Amom ensel hiami Godi mondanda' lotu ma anen atona hi'indalam.”^f

⁷Apa' basef ifimba God naga'ipa amom enselafi na'amba na'i,

“Anen nanda' amom ensel mataga si'i fufin, nanda'am manda' maol ananini mataga si'i nif ileliwa fagalilif.”^g

⁸Apa' Nogamana ananinai na'ipana na'i,

“O God, ina' nape banagonai Dembinai nugumafi hiahaom hiamii, ea' anaf nepe atapina na'amba atin dondol lifilafi.

Waf usi'ifi hilili'i atef ina' dei' nape Dembinai ma anamba ina' nagala'ambemagoma. ⁹Ina' okom magaila waf bu'wafi usi'ifii nandafa'ma waf awafi sogosambala mu'uliefi. Ea' dei' God, anen God ine'inai si'ina, nandandepena nase'ena dagala lu'unai a'owa'. Apa' epes hiasi hi'alas ina sandagala si'i ina', owa'atin.”^h

¹⁰Ea' God na'ias wapani na'i,

“Dembinai, fowa' dambadamba ina' atina nanda' itap pataga, lagol ine'igili atogol ganda' ilif otaga wapani nataga nape. ¹¹Amamba anaf higililam, apa' ina' negape atapinai. Amom molomofe' mofe' anaf motaga apim si'i luwaguf apifi. ¹²Anaf ina' nila'watefam si'i sindiwa luwaguf sagakolasif, ea' amom mohofam si'i luwaguf. Apa' ina' dondol atapina negape na'amba atini, ea' ina anaf hagenanogota ine'itai, owa'atin.”ⁱ

b 1:2 Ko 4:4; Ap 2:33-34; Kl 1:20; Hi 8:1 **c** 1:3 Fl 2:9 **d** 1:4 Ap 13:33; Hi 5:5; 2 Sml 7:14; 1 Kro 17:13 **e** 1:5 Ro 8:29; Sam 97:7 **f** 1:6 Sam 104:4 **g** 1:7 Sam 45:6-7
h 1:9 Sam 102:25-27 **i** 1:12 Sam 110:1

¹³God ina na'ipa anona ensel ananinai na'i,
 “Ina' nepe na'a'e lagol kwahisigili ae'agili wa'ol banagogoma,”
 owa'atin.

Anen na'ipa nogamana atona na'i,
 “Ina' nepe atapina nefe' nefe'ma nemaf afamba ae' enda' bousi ine'isi
 sogafe' lafela bo'wagah ine'igahi.”

God ina na'ipa anona ensela basef ifimba, owa'atin. Na'ipa nogamana
 ananinai atona.^j ¹⁴Dei' amom ensel mamahoma? Amom ambagof bu'wagufi
 manda'mana maol Godii. Anen nasapa'am mafi'i ma mogatopalopa epes
 isimba dei' God nofa'as sogotanimai ma anaf sogofa' poe bu'wani.

God nofa'ai apa' mogotanimai magape andeande', amamba lu'wami endilisi

2 ¹Jisas nikila' amom ensel a'owa'. Isimba atis dei' apa' mondahapila
 basef ifimba ananifi apa' magame'afi sisihif mondailif dindinip.
 Na'amba ambepama basef ifimba mondahagas mokwahona.^k ²Fowa'
 gani God na'ipa amom ensela basef ananifi, ea' ma'ipipaef fandawalap
 endilisi. Dei' basef ifimba fape banagefa epes mamahisa sosambalifa
 owa' silifa, esis sofa' akafimi amamba mondahama du'waniga asasinai
 ma sogosambalif.^l ³God nagwamasa akafimi lu'wami esis sogosambala
 basef ananifii ensel amamba maga'ipasafi. Dei' ipa' ukup pandanda'
 pa'imama? I'i pegewa' alafugaha basef ananifi dei' natopalopapa nofa'apa
 mogape andeande'i, anaf ipa' pefa' pefe' pindihi'ama akafimi amamba
 pi'imama? Owa'atin endilisi. Pefa' akafimi pelomas. Dei' main, amamba
 nakwahomapa waf awafi natopalopapa mogotanimai, ina sa'umi,
 owa'atin. Lu'wami endilisi. Dembinai atona nali' nawalapam alihima anis
 epes. Epes isimba sihimba'mapa ma mogogawa basef amamba endilisim
 atom.^m ⁴Ea' God nowa' banaga basef amamba ma ufiawa hiawai
 wawiwawi. Ano'w nihimba'masa ametal naninani hiani banagani. Apa'
 ano'w nanda' banagami lu'wami mamimami si'i anen atona nanda'ami.
 Ea' ano'w akwamba nawalogamasi hiahaom fasimi dowaf Ambal bu'unai
 ananinai nagaso'asami, naila okom ananiami atom nandahamam dindi'i
 dondo' na'amba ma nigihimba'mapa basef amamba endilisimi atom.

Jisas nape nagali'i Dembinai nofa'apai mogape andeande'i

⁵God ina nanda' amom ensel mape dambema mugumafi waf hiafi
 dambaifi Jisas nagawalapef ea'i, dei' aga'ipipafi, owa'atin.ⁿ ⁶Apa' anif
 basef fagail Baibeli fowa' anona aman nawalapef naga'iefi na'i,
 “God, epes esis mamahisa ma ina' okom magapomas? Esis falafisi
 atis, ina' atina nimafias. ⁷Ina' nanda' amom ensel mape dambem

j 1:13 Sam 34:7, 91:11 **k** 2:1 Ga 3:19 **l** 2:2 Hi 10:29, 12:25 **m** 2:3 Mk 16:20; 1 Ko
 12:4,11 **n** 2:5 Sam 8:4-6

banagem a esis nogota bandata dowaf. Ina' naso'asa agol lu'wagili galoma gawa fasini a'owa'.^o ⁸Ea' nanda' hiahaom hiami mafe' lafela esisa sugumafiam.”

Basef ifimba fagail Baibeli fa'i, “Aho', God nanda' epes sagape itapi sape dambes sumafi hiahaom hiami magape itapi.”

Basef ifimba fa'i hiahaom hiami magape itapi kofagefa fa'i hiahaom hi'alam. Apa' dei' ina mati epes sagape itapi sape dambes sumafi hiahaom chi'alam, ata' owa'.^p ⁹Apa' dei' mogawa Jisas! Fowa' nogota bandata God nanda'ana nafe' lafela amom ensel. God nati apa' uwahipapa natopalopapa dowaf, dei' Jisas nofa' akafimi lu'wami naga' ma apa' hiapai hi'agalapa. Isimba atis dei' God naso'ana agol lu'wagili nanda'ana nataga dembinai king nogala' a'owa'.^q

¹⁰ God anen Dembinai nanda' hiahaom hiami mataga mape numafiama banagami ananiami mape andeande'. Ea' andeande'ma naga'i aho'ma Jisas nogame' akafimi nanda' ufiaw bu'wakwi ma apa'. God nanda'am na'amba ma nokolasa apa' epes hiapai nofa'apa mogafe' heven mugati mogogala'i ananiami. Dei' main, Jisas atona nanda' ufiaw ma nokwahomapa waf awafi nofa'apa mogotanimai.^r ¹¹ Anen atona nanda'apa amam nematawa mataga be'epa hilili' malomana wambota atotota ahamapa atotona. Isimba atis dei' anen ina ambal aola nofalapa naga'i sahin owan ananipai, owa'atin.^s ¹² Si'i anen na'ias naga'i,

“God, ae' atiasi ewalapa agol ine'igili ma esis sahin owan ae'asi. Ae' enda' awalef esa'ma agol ine'igili ma esis hiasi sunduwa'anima atogon hi'igalas.”^t

¹³ Ea' na'ias wapani na'i,

“Ae' ahapifa God banagewe.”

Ea' anif wapani na'if na'i,

“Ae' ape aloma awasi ae'asi God nagasi'iesi.”^u

Jisas nataga epen endilisi ma nagatopalopa apa' hiapai

¹⁴ Epes anen nogofalapa awasi ananipai, epes itapasi sogolapai. Isimba atis Jisas wapani nataga epen na'amba atin si'i apa' epes itapasi sogolasi. Anen nataga epen na'amba ma naga' nogahambombaga aman anamba Satan banagona nanda' epes hiasi sagaga'i. ¹⁵ Jisas natagwaha amam nematawa hiasi dondol ombal mahasa ga', magahapilas sisihisi. Owa' anen natagwahisa ombal amamba magahasi.^v ¹⁶ Dei' main, anen ina naga' natopalopa amom ensel, owa'atin. Anen naga'ma nagatopalopa epes sagataga wambota mini'ap Abrahami.^w ¹⁷ Isimba atis anen nataga na'amba

^o 2:7 1 Ko 15:27 ^p 2:8 Fl 2:8-9 ^q 2:9 Ro 11:36 ^r 2:10 Mt 25:40; Mk 3:35; Jo 20:17
^s 2:11 Sam 22:22 ^t 2:12 Ais 8:17,18 ^u 2:13 Jo 12:31; 1 Jo 3:8; Re 12:10 ^v 2:15 Ais 41:8-9 ^w 2:16 Fl 2:7; Hi 2:14; 1 Jo 2:2, 4:10

atin endilisi si'i owasana ananisi ma nagataga pris dembinai nape nagali'ma pris hiamii. Anen aman naga'i uwahipigama ape'i nanda' maol Godi andeande' endilisi ma nogatofa okom wandafunai Godi nagapoma amam nematawa hiasi sanda' waf awafii. ¹⁸Anen atona name' akafimi ea' nofa' gwamba hiani natagamana na'i nenda'ana nonda' waf awafii. Ea' anen la'ifinai ma nogatopalopa epes isimba gwamba nagatagamasii.

Agol lu'wagili Jisasi gikila' Moses

3 ¹Ipa' alipipai epes Godi, anen nagape ilifi nogofalipai, ipa' peme'. Ipa' ukup pendanda'ma Jisas, anen aposel nogape pris Dembinai ma waf faloma basef kofagefa apa' ea' mahapilaf magawalipasafi. ²Anen naila okom Godi nanda' maol God nandandepanana nonda'ani, si'i fowa' Moses nanda' maol ananini datima natopalopa epes hiasi Godi hi'alas. ³Aman anamba Jisas, God naso'ana agol lu'wagili gikila' agol lu'wagili Mosesi, si'i epes sagaso'ana agol lu'wagili aman nanda' ipat bu'utai nagala'atai itap apa'ii. Apa' esis ina safela agola ipat atamba lu'wagol, owa'atin. ⁴Endilisi, ifagw hiagwi hi'alagw epes sala'agw. Ea' epen okom kilikala'ma nanda' hiahaom hiami hi'agalami, anen God atona. ⁵Endilisi, Moses nanda' maola nagatopalopa epes Godi hi'alas datima andeande' nanda'an si'i nanda' maol Godi, ea' na'i basef nawalapefa hiahawes anaf owagama God noga'iasi. ^z
⁶Apa' Kraisi nape nogamana naila basef endilisi a'owa' nanda' maol datima ma nogape Dembinai nugumafi epes wambota Godi. I'i dondol apa' mohapifana banagepa mi'i endilisi anaf mofa' hiahaom amamba fasimi dei' mape mogohafami, dao' endilisi apa' a' mape wambota ananipai. ^a

Epes sogosambala basef Godii ina sopoma noma'w, owa'

⁷Ea' dei' apa' mondame' basef Ambal bu'unai Godi naga'iefi andeande'. Anen naga'i na'amba na'i,

“Dei' nemaf mamahefa ipa' pegame' malogol ananigili, ^b ⁸ipa' ina apesopama nelelemb ipe'ilimbi sisihilimb a'owa', si'i fowa' bafasepa sanda'am sogosambala basef Godi ma sanda' okom ananinai numbutina, owa'i. Nogota atamba esis sagape anamba wafigima fataupigima esis sagwambana a'owa' sasopama nelelemb. ⁹Esis bafasepa ipe'isi sati banagami hiami ae' anda'ami anamba wafigima ma afagof hiagufi 40-pelaiguf.

Apa' owa', owa'atin. Esis sandanda' ae' gwambai gwambae endilisi a'owa'.

¹⁰Esis sanda'me isimba atis, ae' dei' okom numbutimas endilisi a'i, 'Lililafi ukup asasipi paso'asa ufa'w bu'wakwi sololama'w. Esis ina ata'

^x 3:1 Hi 4:14, 6:20; Hi 7:26, 8:1; Hi 9:11; Nam 12:7 ^y 3:4 Nam 12:7 ^z 3:5 Kl 1:23; Hi 3:14 ^a 3:6 Sam 95:7-11 ^b 3:7 Eks 17:7; Nam 20:2-5

saila waf bu'wafi ae'afi, a' owa'atin.'^c ¹¹Ea' ae' okom numbutima esis a'i basef endilisifi atif banagafi a'i, 'Anaf esis ina ata' sifi'i suwis sopoma noma'w solome, owa'atin endilisi!' ”

Apa' a' solawaipa. Na'amba mosambala basef God si'i esis Israel.

¹²Alipipai ae'ipai, ipa' solawaipa andeande'. Na'amba anin sahin owan la'afena ipa' a' okom mimila waf awafi nekwaha hapif ananini newa' alafugama God nagape namona atapinaii. ¹³Na'ambai owa'i. Apa' ipa' pendewa' banagama atina waf awafi ina fembaso'ma anin epen atitin ipe'ini ninda'ima opaf ananifi sisihif. Penda'as na'amba atin nimaguf danda nogota ata'e God naga'i, “Dei'!” penda'as pilas pendape atapipa.^d ¹⁴Apa' fowa' mali' mahapifana, ea' dei' mondahapifana sisihipa atapipa, mefe' motagama mogaga'. I'i apa' monda'as na'amba atapipa, dao' apa' a' amam nematawa endilisi Kraisi, ma anaf mofa' hiahaom fasimi mogalomana.^e

¹⁵Si'i basef fagail Baibeli doko' aga'ipipafi faga'ias fa'i,

“Dei' ipa' i'i pegame' basefa malogol ananigilima, ipa' ina pesopama nelelemb ipe'ilimbi sisihilimb a'owa' si'i fowa' pegewa' alafugaha Goda panda' okom ananinai numbutina, owa'i.”^f

¹⁶Fowa' epes ami same' basef malogol Godi sowa' alafugahana sanda' okom ananinai numbutina? Epes isimba hiasi fowa' Moses nofa'asi sakwaha Isip sagafi'i, ea' isimba atis.^g ¹⁷Afagof agwafomba hiagufi 40-pelaiguf God okom numbutima ami? Anen okom numbutima epes isimba sanda' waf awafii, ea' saga' lamonas anamba wafigima fataupigima, isimba atis.^h ¹⁸God na'i anis epes na'i basef endilisifi atif banagafi ma esis ina a' sefe' suwis sopoma noma'w solomana. Na'i epes mamahisa? Anen na'i isimba atis. ¹⁹Ea' dei' apa' mogawa esis ina atiasi la'ifisa sefe' suwis sopoma noma'w sogalomana, owa'atin. Dei' main, esis ina sahapifana, owa'.

Epes Godi sogapoma noma'w

4 ¹Basef Godi banagafi endilisi dei' ata' fape atapif. Anen naga'ias na'amba na'i, “Ipa' pefe' piwis anamba sogapoma noma'wa ae'agima.”

Apa' a' ombal mondahapa. Na'amba God niti anin epen atitin ipe'ini okom mohan neleloma amamba nefe' higililan, owa'. ²Dei' main, apa' wapani mame' basef bu'wafi si'i fowa' esis Israel sgame'afi. Apa' esis same'ef dowadowaf, ina sahapifif, owa'atin. Ea' basef ifimba bu'wafi sgame'afi ina fatopalopas kwasakwasala, owa'atin.ⁱ ³Amam nematawa

c 3:10 Nam 14:21-23 **d** 3:13 Hi 3:6 **e** 3:14 Hi 3:7-8 **f** 3:15 Nam 14:1-35 **g** 3:16 1 Ko 10:10 **h** 3:17 Hi 3:11 **i** 4:2 Sam 95:11; Hi 3:11

magahapifa Godi apa' dei' mafe' mawis mapoma noma'w maloma God, si'i anen naga'ias na'i,

“Ae' okom numbutim ea' a'i basef endilisifi atif banagafi a'i, esis ina suwis sopoma noma'w solome, owa'atin endilisi!”

Fowa' nanda' itap apa'ea' hi'alap ea' napoma noma'w nogota laota nafi'i nafi'i nataga dei'. Anen napoma noma'w nasasa esis suwis sopoma noma'w sogalomana. Owa', esis ina sawis, owa'atin.^j ⁴Anif basef God fowa' naga'iefi ma nemaf afamba fagafe'ma 7i sagapoma noma'wafi, faga'ias na'amba fa'i,

“God nanda' maol hiani hi'alan ea', nemaf afamba fagafe'ma 7i fataga, napoma noma'w.”^k

⁵Basef ifimba doko'ifi God naga'ias wapani na'i,

“Esis ina sefe' suwis sopoma noma'w solome, owa'atin endilisi.”

⁶Esis amam nematawa isimba fowa' sagame' basef bu'wafi ina safe' sawis, owa'. Dei' main, esis ina sahapifana endilisi, owa'. Apa' basef ifimba ata' fape atapif fa'i endilisi anis epes atiasi asofe' suwis sopoma noma'w soloma God.^l ⁷Isimba atis dei' ea' nandandepa anef nemaf daiaf wapani. Ea' nofala nemaf afamba na'i dei' atef. Ea' afagof hiagufi fafe'ma ea', God nawalapa basefa nemaf afamba na'i basef ananifi doko'ifi ma malogol Deviti na'amba na'i,

“Dei' ipa' i'i pegame' basefa malogol ananigilima, ipa' ina pesopama nelelemb ipe'ilimbi banagelemb a'owa', owa'i.”^m

⁸I'i nemaf afamba fowa' Josua nonda'as suwis sopoma noma'wai, anaf God ina ni'i anef nemaf daiaf, owa'atin. Apa' owa' owa'atin. Esis ina sawis, owa'. ⁹Isimba atis dei' mogawa waf afamba mogapoma noma'wafi ata' fape atapifa apa' epes amam nematawa Godi. Waf afamba si'i God nagapoma noma'w nemaf afamba fagafe'ma 7i.ⁿ ¹⁰Dei' main, epes mamahisa sofe' suwis sopoma noma'w sogaloma Godi esis asambifa maol asasini ea' sapoma noma'w, si'i fowa' God nambifa maol ananini ma nagapoma noma'w. ¹¹Ea' dei' apa' mondanda' maol banagambel mofe' muwis mopoma noma'w mondalomana. Na'amba anin epen ape'ini nesambala basef Godi newa ma waf awafi anaf higililan si'i fowa' esis sanda'ama sowa higilagalas lamonas.^o

¹²Dei' main, basef Godi na'if atapif fagapani, ea' banagef atapif. Ifimba hikali' a'owa' fikila' bainat hikakalina wa'owa'ili fapisila epes fagawis nomon endilisi. Basef ifimba fawis fafe' la'afena ukupi ambagof asasis sondowatanimama a' fafe' fawala so'matagwi gonat la'afisa. Ea' fawaloga ukupi nomonas ape'isi nomon. ¹³Ina anom hiahaom God nanda'ami atiasi mondambaho'ma anen, owa'atin. Hiahaom amamba hiami hi'alam ea'

j 4:3 Jen 2:2 **k** 4:4 Sam 95:11 **l** 4:6 Sam 95:7-8 **m** 4:7 Diu 31:7; Jos 22:4 **n** 4:9 Hi 4:4 **o** 4:11 1 Pi 1:23; Ef 6:17; Re 1:16, 19:15; Jo 12:48

mandawisi' mape mandawalap alihim endilisi ma naep ananipi. Ea' anaf apa' mi'ipana waf maif hiafi hi'ilaf apa' manda'afi.^p

Jisas Pris Dembinai ape'inai nape nagali'ma pris hiamii

¹⁴ Apa' anona pris Dembinai ape'inai nape nagali'ina pris hiamii nafe' nawis heven endilisi nape naloma God. Anen Jisas, Nogamana Godi. Ea' dei' apa' mondahapifa waf mahapifa God magawalapafi tetele'if. ¹⁵ Pris anamba Dembinai anen la'ifinama nogati apa' uwahipipa, nogota mamahotama apa' owa' banagepama mogahagasa waf awafia, ea' alop owa' la'ifipa ma monda' maola. Hiahaom hiami hi'alam mataga magagwamba ape'i, amamba mali' mataga magwamba anen wapani ea'. Apa' anen ina nanda' anef waf awafi, owa'atin endilisi.^q ¹⁶ Isimba atis apa' dei' ukup banagep mondafefelefele'ma God, ombal mogahapa owa'i. Anen nagatopalopa apa' dowafi ma magape andeande'i. Ea' apa' mofe'ma anona atiasi niti uwahipipa notopalopapa dowaf nugumafiapa nogota mamahotama mogofa' nimanimi akafimi awamiatai.

**Jisas pris Dembinai ape'inai nape nagali'ima pris hiamii,
anen la'ifinai endilisi ma nogatopalopapa**

5 ¹ Waf afamba fowa' sandandepa pris hiami dembami mape magali'ma pris hiamii na'amba. Anota nogota sandandepa anona sanda'ana napoma maol Godi ma nogofa' malogof epesi nugalutu naep Godi. Esis saso'ana hiahawes fasisi naso' God nondolalimanama nogakwaha waf awafi esis sanda'afi.^r ² Anen pupulina ea' ina banagona ma nonda' waf bu'wafi atef nimaguf danda, owa'. Isimba atis sanda'ana dei' la'ifinama nogatopalopa esis sagakwaha ufiaw Godi nonda'as sa'ombemas.^s ³ Anen pupulina, isimba atis dei' nondolali ma God nagakwaha waf awafi ananifi faloma waf awafi esis amam nematawai wapani.^t ⁴ Maol inimba nondolalima Godi nogofa' agol lu'wagilii. Ea' ina anona aman la'ifina ma nogofa' maol inimba okom ananiami atom, owa'atin. God nili' nofalana, dao' nohapila maol inimba, si'i fowa' nogofala Eran.^u

⁵ Krais wapani na'amba atin. Anen ina nasa'ma agol ananigili atogol nataga pris dembinai, owa'atin. God atona nandandepana nanda' maol inimba, ea' na'ipana na'i,

“Ina' Nogame ae'inai. Dei' awalapena alihina asa'ma agol ine'igili lu'wagol.”^v

⁶ Ea' God na'i basef du'wanif wapani na'ias na'amba na'i,

P 4:13 Hi 3:1, 10:23 **q 4:15** Hi 10:19 **r 5:1** Hi 4:15 **s 5:2** Lev 9:7, 16:6 **t 5:3** Eks 28:1
u 5:4 Hi 1:5 **v 5:5** Sam 110:4; Hi 6:20, 7:1,17

“Ina' nepe pris Dembinai dondol lifilafii nendelalimai na'amba atin nendahama Melkisedek.”^w

⁷Fowa' Jisas ata' nagape epen endilisi itap apa'e, nandabeten nagahali' God, la'ifinai ma nofa'ana nokwaha ga' ma nogape namona. Nandabeten, nofalana mehipe nalef nape hiafi.

Anen natalogofa anen atona nafe' lafela God. Ea' dei' God name'anama beten ananini. ⁸Endilisi Jisas Nogamana Godi, owa' anen name' akafimi, ea' amamba atom mawalipana endilisi ma waf nagaila okom Godi. ⁹Anen nataga nogamana Godi bo'ona endilisi. Isimba atis dei' anen kofagonama epes sagaila basef ananifii nokwahomas waf awafi sofa' ambal namili sogape andeande' lifilafi.^x ¹⁰God nandandepana ea' na'i, “Ina nepe pris Dembinai nendelalima ae' na'amba atin nendahama Melkisedek.”

Apa' ina mope si'i awasi sa'wisi gawa akasi, owa'

¹¹Basef hiafi Melkisedeki ata' fape ea' dei' a'i i'pipaef. Apa' owa' dei' ipa' ina pandagala ma pegegawa basef Godi kofagefa, owa'atin. Ea' dei' ae' maol lu'wani ahifin a'owa' ma igihimba'mepa basef ifimba kofagefa.^y

¹²Dei' nogota ata'e ea' ma ipa' pegape dembipai tisa pigawalipa anis daias. Apa' owa' owa'atin. Ipa' gawa du'wanin atina ukup ipe'ipi, ea' anona aman ata' nowalipipa wapani ma basef fagali'i Godi. Ipa' ina banagepa pegegawa basef lu'wafi Godi si'i paga' gwa'aisi banagasi, ata' owa'. Ipa' ilama ata' pegegawa basef fagali'i Godi atif si'i paga' nomagof atogof. ¹³Apa' mogawa epes mamahisa saga' nomagof atogufi, esis sagape awasi sa'wisi atis. Isimbai ina dei' la'ifisa sogawaloga waf bu'wafi awafi, ata' owa'.^z ¹⁴Apa' gwa'aisi banagasi sapoma epes isimba ea' sagataga dambes banagasi atis. Epes isimba ea' sawalipa ukupi nomonas asasisi atis hihif dondola dei' banagesa sogawaloga waf bu'wafi awafi.

Apa' a' ukup kilikala' pepe ma mogohapifa God banagepa

6 ¹⁻²Apa' ina ata' atapipa mi'i basef ifimba fagali'i Kraisi atif timbi tambel, owa'. Apa' ina mi'i basef ifimba fagali'i mi'i, apa' mondambema nelelemba God mowa' alafugaha waf hiafi awafi fanda' epes higilgalasi ea' mondahapifa Goda basef fafifafi sagapis'asa embeli sandabeten sagawamona lagofa anis epes, faloma epes hiasi sagaga'i sogosafel wapani, a anaf God nowawaloga epes hiasi ma sogape atapis wambel bu'wambili beloma awambili. Apa' ina mope monda' basef ifimba atif kikif atapif timbi tambel, owa'. Apa' ata' mofo'o atefas ea' monda' basef fegewa' banagasi mi'if si'i isimba dambes ea'i.^a ³I'i okom God mi'i isimbaiai, dao' monda'as na'amba atin.

^w 5:6 Mt 26:39-46; Fl 2:6-8 ^x 5:9 Hi 5:6 ^y 5:11 1 Ko 3:1-3 ^z 5:13 Ro 16:19; Fl 1:10
^a 6:1-2 Hi 9:14

⁴Epes isimba sowa ma waf awafi sogowa' alafugaha Godi, ina ano'w ufiaw'a esis sotanima sifi'i sogambema nelelemb wapani, owa'atin. Esis sali' sofa' nogogala'i Godi, sofa' presen hiahaom fasimi magafi'i heveni ea', a sofa' Ambal bu'unai Godi napais.^b ⁵Ea' sambama basef Godi sameme'mef, asogawef fasif a'owa', sameme'ma maol banagani dambaini hiani alipisi Kraisi sanda'ani.^c ⁶I'i esis sowa ma waf awafi, sowa' alafugaha God a'owa', ina ata' ano'w ufiaw'a esis sotanimai sifi'i sogambema nelelemb wapani, a' owa'atin. Waf afamba esis sanda'afi atef, dei' sandola Nogamana Godi nail lawag usi'igai ti'wanaegai wapani ma sagahambombagana. Esis sowa' alafugaha God sanda' waf na'ambai, sanda' epes hiasi sanda'ana findiwana ma basef awafi.

⁷Anep itap asaf falai lifilafi fanda'ap panda' gwa'aisi sataga salo andeande'ma sagatopalopa amam nematawa sanda' maol itap aof afambai, itap apamba God nanda'ap pape andeande'.^d ⁸Apa' anep itap daiap panda' otalef wandafilifi atelef hielef fagatagai, apamba falafalafipi awasipi. Ea' felefele'ma God nogahambombaga itap apamba ma anaf fegandep nif lu'wafi.

⁹Ipa' alipipai ae'ipai endilisi, dei' ae' a'ipipa basef ifimba nimanifi, apa' owa' ae' egawa endilisi anaf ipa' ina awepa higililipa na'amba, owa'atin. Ae' egawa God anaf notopalopepa nofa'ipai pepe andeande'.^e ¹⁰God ina epen aunai ma atiasi okom mogaso'ana opeh hiahi ipa' panda'ahi, owa'atin. Ipa' ukup paipailana. Isimba atis dei' sasa'mai ipa' ma panda' maol inimba ma pegatopalopa amam nematawa ananisi. Ea' dei' ata' panda'as na'amba atapipa.^f ¹¹Ae' okom ma'i ipa' hipai atona atin ukup kilikala' pelele' na'amba atin pefe' pefe' petagama nemaf afamba Kraisi nogafi'afii ma pegegawa endilisi anaf anen nogofa'i ipa'. ¹²Ae' a'i ipa' ina ala'uta tehepa, owa'i. Ipa' pindaila waf epes isimba sagahapifa God endilisii ma esis owa' ukup iwanip kwafalisa, sogofa' hiahaom bu'wami fowa' God na'iasa basef nagala' lapafi na'i nogaso'asam epes ananisii.

Apa' mondahapifa basef God nagala' lapafi andeande'

¹³Fowa' God naloma Abraham ma'i basef endilisifi magala' lapafi. Ea' ina anona aman daiana dembinai nikila' God, ama God noga'i basef ifimba endilisifi atifa agol ananigili atogol, owa'atin. Ea' dei' God na'i basef ifimba nagala' lapafi endilisifi atifa agol ananigili atogol.^g ¹⁴Anen na'i, "Dei' ae' a'i endilisi atis, etopalopena enda' wambota bafasena ine'isi sigi' sogatagai sotaga hias a'owa'."

b 6:4 1 Pi 2:3 **c** 6:5 Mt 12:31; Hi 10:26-27; 1 Jo 5:16 **d** 6:7 Jen 3:17-18 **e** 6:9 Hi 10:32-34 **f** 6:10 Hi 3:14 **g** 6:13 Jen 22:16-17

¹⁵Ea' Abraham name' basef ifimba dei' ina ala'uta tahana kwafalis, owa'atin. Nape nasasa hiahaom fasimi God fowa' na'i noso'anam mugaila basef ifimba magala' lapafi.^h

¹⁶Waf epes saga'i basef endilisifi atif saga'if banagafi afamba. Epes saga'i basef ifimbai ma agol anona dembinai nikila' esis. I'i anin epen niga'i basef ifimbai, anin nasopama malogofa epes mamahisa sa'i sogapa'aga basef ananifii. ¹⁷Fowa' God na'i nihimba'mas okom ananiami mape atapim alihima awasi ananisi anaf sogofa' hiahaom fasimi si'i naga'ipas basef ananifi nagala' lapafi. Na'i nihimba'masa anaf anen ina nonda' anif dambaifi feha'ofa basef ifimba ananifi, owa'atin. Ifimba atif. Isimba atis dei' na'ias banages endilisi atisa agol ananigili atogol nogowa' banaga basef ifimba nagala' lapafi.ⁱ ¹⁸Anen na'i basef ifimba nagala' lapafi, ma main na'i anif basef na'ambaif atini naga'i endilisi atisafi. Basef ifimba biafif faga'ias na'amba atin dei' fape atapif, ina anin mae neloma anis soho'ofef, owa'atin endilisi. Anen na'ipapa basef ifimba ma fegewa' banaga nelelemb ape'ilimbi endilisi, apa' amam nematawa mafa' mafe' mandambaho' felefele'ma anini. Anen na'ipapa basef ifimba ma mogohapifif tatala'if mogawa endilisi mogahapila hiahaom fasimi mape mogohafami.

¹⁹Gawa inimba ma apa' mogogawa endilisi anaf mohapila hiahaom fasimi, nagape na'amba. Gawa inimba banagani fasini mape magasasani inimba na'ambai nogombalo' opalefi ambagof ape'isi si'i sanda' anka nogombalo' sip lu'wapi nahapilap sisihip atapip pagala embel ilif. Gawa bu'wani inimba nawis hi'alan newala gani nomon bo'wagon hilili'ma lowaf lu'wafi alafugaifa sandolaf fagail si'i uta ipat Godi lu'unai heven nomon.^j ²⁰Anamba Jisas nali'apa nafe' nawis ipat anamba nomon ma nogatopalopapa. Anen nataga pris dembinai dei' nape atapina dondol lifilafi na'amba atin si'i Melkisedek.

Melkisedek anen pris dembinai agol ananigili lu'wagilinai endilisi

7 ¹Aman anamba Melkisedek anen king dembinai nugumafi anembel wambel Salemi, anen pris nondolalima God Dembinai nagape ilif endilisii. Fowa' Abraham nanda' wandaf naha anom king dembami nali'amonam nafe' ma notanima nafe' wambel owa' Melkisedek natolona ea' nofalo'mana nowa' banagona.^k ²Ea' Abraham nawaloga hiahawes gwa'aisi mais ananisi hi'alas ilifunamais atona atin, naso'ana du'wanis ilifunamais safe'ma Melkisedek. Apa' dei' mambema agol agalemba Melkisedek, basef kofagefa biafif. Anif fa'i king dembinai nanda' waf usi'ifi atef datimaii. Ea' anif fa'i anen king dembinai nogaso'apa opalef

h 6:15 Eks 22:10-11 **i** 6:17 Nam 23:19; 1 Sml 15:29 **j** 6:19 Lev 16:2-3; Lev 16:12,15; Hi 5:6 **k** 7:1 Jen 14:17-20

awanelifii. Dei' main, anen king dembinai nugumafi wambel ambalemba Salemi, dei' mambema basef ifimba ma Salem ma' opalef awanelef.¹
³Anen Ahamanai ma'mana akana. Anen bafasana wambota ananisi akana. Ea' nemaf ma'mana kogolanafi owa', ea' nemaf nagaga'afi wapani owa' sogawafa. Anen nape si'i Nogamana Godi, nape pris dembinai nogape atapina dondol lifilafii.

⁴Dei' ipa' ukup pendapoma Melkisedek, anen agol lu'wagilinai endilisi. Dembinai bafamapa ape'inai nagali'i anen Abraham. Anen natambe' hiahaom hiami bu'wami atom nogofa'ama wandafi nawaloga ilifunamaim atona atin ea' nakolasom ondot atota naso'anam mafe'ma Melkisedek.^m ⁵Amom wambota awasi bafapana Livaii anom a' mofa' maol inimba pris. Ea' mu'uli inimba God nagaso' Mosesani na'ipa amom atom manda' maol inimbai na'amba na'i amom a' mondowaloga hiahawes isimba hiasi du'wanis ilifunamais atona atin esis Israeli. Esis Israel sahin owan amamisi endilisi, ea' esis bafasana awasi Abrahami wapani. Apa' owa', owa'atin, amom Livai mofa' gwa'aisi mais hiasi du'wanis ilifunamaisa esis sahin owan amamisi. ⁶Apa' Melkisedek ina nataga wambota amamutai, owa'. Apa' owa', anen nogofa' hiahawes du'wanis ilifunamais hiasi Abraham nogawalogasi. Ea' Melkisedek nofalo'mana na'ipana nowa' banaga aman anamba basef bu'wafi God nala' lapef fagapomanai. ⁷Apa' ea' mogawa, aman nogofalo'manai nape ilifa aman anamba nogofa' blesin inimbai. ⁸Amom Livai manda' maol mondolalima Godi mofa' hiahawes du'wanis ilifunamais, amom anaf mogaga'i atom. Apa' Melkisedek nofa' hiahawes sagawalogasi du'wanis ilifunamaisi, anen nagape namunai dondol lifilafii, si'i buk Baibel naga'i. ⁹⁻¹⁰Apa' ilama muga'ias na'amba.

Fowa' Melkisedek nagatagama Abraham ufia'wafi, Abraham naso'ana hiahawes isimba nogawalogasi ilifunamais du'wanis safe'ma Melkisedek. Ama main, Livai bafapana magi' mataga manda' maol inimba mofa' hiahawes isimba ilifunamais du'wanis esis Israel sagawalogasi.

Ea' na'amba atin si'i Livai nagaso'ana du'wanis Melkisedeka lagol Abrahami. Dei' main, nemaf afamba Abraham nagaso'anas Melkisedekafi, Livai owa' ata' solana notagaia, ata' nape opalef nomon bafapana Abrahami.

Aman dambainai dei' naho'ofa pris fowa'imi

¹¹Fowa' esis amam nematawa sofa' basefa mu'uli inimba God nagaso' Mosesani. Kofagonama mu'uli inimbai amom wambota Livai mahapila maol inimba pris. Apa' i'i maol inimba amom pris manda'ani ilama nenda' esis amam nematawa sotaga bo'wesa naep Godiai, dei' maina ata'

¹ 7:2 Sam 110:4 **m** 7:4 Nam 18:21

anona pris dambainai nogataga wapani si'i Melkisedek, apa' ina si'i Eran? Owa'atin. ¹²Basef ifimba dei' fape banagef na'amba. I'i amom pris monda' hu'ufi ho'of anaf nemaf, ea' dao' basefa mu'uli inimba wapani a' nenda' hu'ufi ho'of na'amba atin. ¹³Dembina' ape'inai basef ifimba faga'ianai, anen anota wambota daiata. Wambota ananitai ina a' anona fowa' nanda' maola belita amom magaofa mafis mais mondolalima Godatai, owa'atin.ⁿ ¹⁴Apa' mogawa, Dembinai ape'inai nataga wambota Judai. Apa' Moses ina na'i anom wambota atambaimi motaga mope pris, owa'atin.

Jisas nape pris motaga dembinai lifilafi nandahama Melkisedek

¹⁵Apa' mati anona pris dembinai nataga, naho'ofa amom pris magali'i, fataga anen si'i Melkisedek. Basef ifimba ma mu'uli inimba fataga faha'ofa mu'uli inimba nagali'i dei' fandawalap alihif na'amba. ¹⁶Anen ina nataga prisa anin mu'uli epesi, a'a wambota mamahotama, owa'. Anen nataga prisa banagami ambal namili lagapaunai lifilafi dondoli.^o ¹⁷Dei' main, basef fagail Baibeli faga'i anen fa'i,

“Ina' nepe pris dembinai dondol lifilafi nandahama Melkisedek.”

¹⁸God nelefata mu'uli inimba nagaso' Mosesani ea'. Dei' main, mu'uli inimba owa' banagena negatopalopa apa'a, owa'atin.^p ¹⁹Mu'uli inimba ina nanda' anis epes sataga bo'wes hilili' ma naep Godi, owa'atin. Ea' dei' God nandogwa ano'w ufia'w, akwamba bu'wakwi kwikila' mu'uli inimba, dei' ufia'w akwamba ato'w apa' mofe' felefele'ma anen.

²⁰Afamba God nandandepa Jisasa mogataga pris Dembinai, ina nanda'ana nosaho'ana dowaf, owa'atin. Anen na'i basef endilisifi atif naga'if banagafi ea' nandandepana. Amom pris fowa'imi ina nandandepam na'amba si'i anen, owa'.^q ²¹Apa' God na'i basef endilisifi atif naga'if banagafi ea' nanda' Jisas nataga pris dembinai. Anen nataga pris nemaf afamba God na'ipana naga'i,

“Dembinai na'i basef endilisifi atif naga'if banagafima anaf anen ina noho'ofa okom ananiami wapani, owa'atin. Ina' nepe pris dembinai dondol lifilafi.”^r

²²God na'i basef ifimba naga'if banagafi. Isimba atis dei' Jisas nataga Dembinai kofagonama basef bu'wafi dambaifi God nagala' lapafi fikila' basef fowa' nali' nagala' lapafi. ²³Fowa' amom pris amom hiami. Dei' main, amom anaf mogaga'i ina la'ifima mogape atapim, owa'. ²⁴Apa' Jisas dei' nogape namona atapina dondol lifilafii. Isimba atis dei' a' nape pris Dembinai atapina.^s ²⁵Isimba atis dei' anen la'ifinai nofa' esis amam nematawa sogotanimai felefele'ma Goda agol ananigili, ma

ⁿ 7:13 Jen 49:10; Ais 11:1; Mt 2:6; Re 5:5 ^o 7:16 Hi 5:6 ^p 7:18 Hi 9:9 ^q 7:20 Hi 5:6
^r 7:21 Hi 8:6, 12:24 ^s 7:24 Ro 8:34

sogape andeande' lifilafi. Dei' main, anen nogape ambal lagapaona lifilafii nandabetena God nogatopalopas.^t

Jisas pris Dembinai la'ifina endilisi ma nogatopalopapa

²⁶Pris Dembinai na'ambainai, la'ifina endilisi ma nogatopalopapa. Anen bo'ona hilili'i, waf awafi akana. Anen okom bu'wamunai, dei' nape laogona epes awasi sanda' waf awafii. God naso'ana agol lu'wagili nikila' ilif a' ilif a'owa'.^u ²⁷Amom pris dembami fowa'imi mondolalima God nimaguf hiafi dondol. Magali' ata' mondolalimana ma nagakwaha waf awafi amamifi. Ama main, magi' mondolalimana ma nagakwaha waf awafi esis amam nematawai. Apa' Jisas ina nanda'as si'i amom, owa'atin. Anen nondolali ma God nemaf atetef dowafa waf awafi epes hiasii ea' ma'um. Ama naso' anen atona nagafe'ma God.^v ²⁸Mu'uli inimba God nagaso' Mosesani nesaho' amam amamba owa' la'ifima monda' waf bu'wafi nimaguf dandaia ea' mape pris dembami. Apa' basef ifimba endilisifi atif God naga'if banagafi, ifimba fataga fagi'ma mu'uli inimbai, fandandepa Nogamana ananinai, anen nagataga bo'ona hilili' atapinai.

Jisas nape pris Dembinai ipat Godi lu'unai endilisi gani heven

8 ¹Basef ifimba anda'afi fape fagali'i, kofagefa na'amba. Apa' ea' anona pris Dembinai nape nagali'ma pris hiamii na'amba atin si'i basef fagali'i faga'iana. Anen nagape sia bu'wani Dembinai wa'ol banagagoma felefele'ma lagol kwahisigilima gani heven.^w ²Anen nahapila maol inimba nondolali ma God ipat lu'unai ananinai. Ipat anamba lotu'unai endilisinai. Anona aman ina nala' ipat anamba, owa'atin. Dembinai atona nasa'mana notawa.

³Fowa' God nandandepa amom pris dembami mofa' hiahawes fasisi gwa'aisi mafis sasisasi ma mondolalimana. Ea' Dembinai ape'inai wapani nofa'i anis hiahawes nondolalimanasi. ⁴I'i anen itapanai, anen ina dei' nope pris Dembinai, owa'. Dei' main, amom hiami ea' mape pris manda' maola mogofa'i hiahawes isimba hiasi mondolalima God, si'i mu'uli nagaso' Mosesani naga'ias. Apa' owa'atin, anen ina nape nanda' maol inimba itap apa'e, owa'.^x ⁵Amom mahapila maol inimba mondolalima Godani manda' maol ipat ananinai fowa' sanda' lotuwanai nondola'waif dowafa ipat nani endilisinai hilili'i nagape heveni. Isimba atis afamba Moses na'i nogala' ipat anamba sogowalo' selanai, God na'ipana na'i, "Ina' solawaina ombal mondehena andeande'ma atiasi nenda' hiahaom hiami hi'ilam migi'mam mondahamam dindi'i dondo' endilisi si'i ametal inimba ae' igihimba'menam halafuta Sainaii."^y

^t 7:25 Hi 3:1 ^u 7:26 Hi 5:3 ^v 7:27 Hi 5:1-2 ^w 8:1 Hi 1:3, 3:1; Hi 10:12, 12:2 ^x 8:4 Kl 2:17; Hi 9:23; Eks 25:40 ^y 8:5 Hi 7:22, 9:15

⁶Apa' owa', Jisas ea' nanda' maol inimba nondolalima Godani ea' maol inimba a' nikila'an endilisi maol amom pris fowa'imi manda'ani. Dei' main, anen nape la'afena Godi epes ananisi ma basef ifimba dambaifi God nala' lapef nagalomasafi. Ea' dei' basef ifimba dambaifi fikila' basef fowa'ifi God nala' lap nagaloma Mosesafi. Isimba atis dei' basef ifimba dambaifi fataga fawalapai basef bu'wafi endilisifi God nogowa'ef sisihifi fikila' fowa'ifi.

Basef dambaifi God nala' lap nagalomapa afi fikila' basef endilisi fowa'ifi

⁷I'i basef ifimba fowa' God nala' lap nagaloma Mosesafi fepe be'ef atapifai, dei' basef ifimba God nagala' lapafi fagafe'ma bifi, maol fenda'ani owa' anina. Apa' owa', owa'atin.^z ⁸Owa' God nawalapa waf awafi epesi, ea' na'i,

“Ae' Dembiwai a'i, ‘Peme! Anaf anef nemaf atetef enda' anif basef dambaifi ela' lapef egaloma esis mini'ap wambota Israeli ma mini'ap Judai wapani. ⁹Basef ifimba dambaifi ina fandahama ifimba anif fowa'ifi ala' lapef a'if agaloma esisi, owa'atin. Fowa' ala' lapa basef ifimba alomasa, afamba agahipa lagof asasigufi ma efa'as sakwaha itap lu'upa Isipi sagafe'. Apa' esis ina saila basef ifimba ala' lap agalomasafi, owa'atin. Ea' dei' andambema ewa'asa alafuga esis.’ Ae' Dembiwai aga'ias na'amba.^a ¹⁰Anaf nimaguf ifimba hi'ilif, ama main, ae' enda' anif basef ela' lapef eloma mini'ap esis Israeli. Basef ifimba kofagefa na'amba. Anaf enda' mu'uli ae'ani nepe opalef asasilifi nomon, ea' enda'an nepe ukup asasipi nomon. Ea' epe God asasiwai, esis sope amam nematawa wambota ae'asi. ¹¹Anaf esis amam nematawa hiasi atona atin maol akasa sogawalipa esis alipisi asasisi sogaloma sahin owan asasisi siga'i, ‘Ipa' pendegawa Dembinai’, owa'atin. Dei' main, nogota atamba epes hiasi a' sogawa ae' andeande' hi'ilas, awasi sa'wisi soloma isimba ea' dambesi wapani.^b ¹²Anaf ae' iti esis uwahipis ea' etopalopas dowaf sotanimai sope andeande', ea' ili'amona waf awafi esis sanda'afi.

Ea' waf afamba awafi asasifi anaf ae' ina ata' okom mondanda'maf wapani, a' owa'atin.”

¹³Basef ifimba dei' nagala' lapafi God nofalet na'i basef ifimba dambaifi, fanda' ifimba fowa' nagala' lapafi dei' fataga apif ea'. Hiahawes sagataga apisi isimba sataga hages, ea' sope nogota bandata ma higililas hi'igalas.

**Amom pris dembami fowa'imi maha mafis mofa'as
saloma esimbel mondolali maso' God**

9 ¹Basef fagali'i God nagala' lapafi, anen nanda' anif basefa mu'uli na'ipasana anona ipat bo'ona hilili'i nogotawa itap apa'e ma sonda'

^z 8:7 Jer 31:31-34 ^a 8:9 Hi 10:16 ^b 8:11 Hi 10:17

lotuwanai.^c ²Ipat anamba sanda' sel sanda'ana. Sawalogon biafigin wa'ol nape nagali'ii sofalagon sa'i, "Bo'wagoma hilili'i". Hiahaom maga'oh anamba nomoni, amamba wanifim. Anona ileliwa wagataganai sanda' gol sanda'ami naloma anota belita magawamona bret mondolali magaso'anota Godi.^d ³⁻⁴Apa' wa'ol lowaf alafugifa sowaolaf fetaol fawalogon figili'ama ganimba wa'ol momo'w nomone'wai, anamba sofalagon sa'i, "Bo'wagom hilili' a'owa'ma." Hiahaom maga'oh na'amba nomoni amamba. Belita manda' gol manda'atai, pris mondolalima Goda hiahawes nogoh ambul alogw fasigwi gwagasatai taloma anis bokis atitis basef God nagala' lapafi fagalasi. Bokis isimba sanda' gol sanda'asi ea' ande'esa si'isa gol atona. Bokis isimba nomonesa sala anol botol si'i malep sanda' gol sanda'api. Anis gwa'aisi esis Juda fowa' saga'as anamba wafigimai sofalas saga'i manai sala botol alamba nomon. Botol alamba lala bokis isimba laloma kalamuta Erani fowa' dahanamb kigalalamba soh hagatagambi. Saloma otamba biamba sagandondombamba hilili'i ma God fowa' nanda' basef ifimba nala' lap nagaloma esis Judafi fagailami. Isimba sala bokis isimba nomon.^e ⁵Apa' hiahaom magatoma ilifa bokis isimba ando'i amamba. Anom hiahaom biam si'i enseli sanda' gol mogolala'i sagandombami mondola'waifa God nalutu nagalomas. Amamba matoma ilifa bokis isimba. Bihinagof fandagiam malo'mamam na'amba lafel mondolali magakolo' esimbel bagali'amona okom wandafunai Godima. Apa' dei' ae' ina la'ifiwi ma iga'i basefa hiahaom amamba kofagema egenandonaef hi'igalef, owa'atin.^f

⁶Esis sanda' hiahaom mape alihima, nimaguf danda amom pris mawis ipat anamba nomon rum wa'am ando' mondolalimana.^g ⁷Apa' ganimba nomon wa'ol nagape atina saga'i, "Bo'wagoma hilili' a' owa' ma", owa'. Anamba pris dembinai atona nape nagali'ma pris hiamii nafe' nagawis nemaf atetefa afagof danda. Apa' ina nafe' nawis dowadowaf, owa'atin. Anen nofa' esimbel atembel mafisi nafe' nawis ganimba nomon nagape atina. Esimbel ambalemba nofa'ambela nondolalima Goda nogakwaha waf awafi ananifi ata' fili', ea' waf awafi esis amam nematawai wapani. Waf afamba esis owa' sogawa andeande' sonda'afa.^h ⁸Pris anamba nawis nanda' maol inimbai ma Ambal bu'unai Godi nigihimba'mapa na'amba. I'i ipat anamba nomon wa'ol nape nagali'ma ata' anin maol nepe ma sonda'anai, dao' ufia'w akwamba ma apa' mofe' mugawis ganimba saga'i, "Bo'wagoma hilili' a'owa'ma", akwamba ina kwataga kwandawalap alihi'w, ata' owa'.ⁱ ⁹Ipat anamba nihimba'mapa nogota ata'e dei'itai, nondola'waif nihimba'mapa basef na'amba. Dondol epes hiasi sanda'

c 9:1 Eks 25:23-40; Eks 26:1-30 **d** 9:2 Eks 16:33; Eks 25:10-16; Eks 26:31-33; Eks 30:1-6; Nam 17:8-11; Diu 10:3-5 **e** 9:3-4 Eks 25:18-22 **f** 9:5 Nam 18:2-6 **g** 9:6 Eks 16:2-34
h 9:7 Hi 10:19 **i** 9:8 Hi 10:1-2

lotuma God sofa'ai hiahawes isimba fasifi gwa'aisi mafis sasisasi sondolali sagaso' Goda nagakwaha waf awafi asasifi. Apa' isimba ina la'ifisa sonda' malogof fagape opalef esis nomoni andeande'ma fegataga bo'walef endilisi, owa'atin.^j ¹⁰Waf afamba sondolalimanafi kofagefa afamba. Waf saga' gwa'aisii embelafi faloma waf sa'ofaifi ma sotofa alogw awagwi sogataga be'esa naep Godi. Isimba hiahawes alop atopasi, God naso'as mu'uli inimba ma silan atapis sefe' sotagama nogota atamba nogaha'ofa hiahaom dambaimi.^k

Krais naga' nondolali naso'ana esimbel ananimbeli God

¹¹Dei' Krais nafi'i ea', nataga pris Dembinai nape nogali'ma pris fowa'imi hiamii. Ea' numafi hiahaom amamba mataga magape ea'i. Anen ea' nafe' nawis nomon endilisi ipat anamba agol lu'wagilinai, bu'winai endilisi nikila' ipat atamba selitai fowa'itai togotawa itap apa'ii. Apa' ipat anamba dei'inai ina notawa itap apa'e, epes sanda'ana sagala'ana lagof asasigufi, owa'atin. ¹²Krais nawis nomon ipat anamba nafe' ganimba nomon nagape atina saga'i, "Bo'wagoma hilili' a'owa'ma". Anen nanda'am na'amba nemaf atetef, ea' ma'um. Apa' anen ina nofa' esimbel memem baloma bulmakaum nogami nawis ipat anamba, owa'atin. Anen nawis nondolalima Goda esimbeli alop ananisi atis si'is, ea' ma'wis isimba atis. Anen nanda'am na'amba natala apa' natagwahepama waf awafi fagawasi'apai ma mogape andeande' dondol lifilafi.^l ¹³Nemaf mamahefa anis epes alogw gwailasa naep Godi, amom pris maha bulmakau suwafumi maofam mofa' esimbel amamibeli baloma agamb na'ol bulmakau numa'inai maga'atonai. Ea' mowali'masam epes isimba. Manda'as na'amba epes isimbai sataga bo'wesa alop atop ando'a naep Godi.^m ¹⁴Apa' esimbel Kraisi bikila' isimba a'owa'. Krais ina nanda' anef waf awafi, owa'atin endilisi. Ambal bu'unai Godi nagape namona dondol lifilafii natopalopana ma nondolalima God naso'ana anen atona hi'agalana. Isimba atis dei' esimbel ananimbeli ina bandombasa alop atop ape'ipi ando', owa'. Ambalemba bandombasa malogof fagape opalef ape'ilifi nomoni bo'walef hilili' pelele' a'owa' ea' bakwaha waf naninani wafinai ma apa' dei' mugahapila maol God nagape namunai.ⁿ

Esimbel Kraisi bewa' banaga basef dambaifi God nagala' lapafi

¹⁵Isimba atis dei' Krais nape la'afen numafi basef ifimba dambaifi God nagala' lapafi. Anen naga' ea' ma natala esis amam nematawa nogatagwahisa waf awafi esis sanda'afi nogota atamba sagape lafela basef God nali' nagala' lapafi. Ea' dei' amam nematawa mamahisa

j 9:9 Lev 11:2,25; Lev 15:18; Nam 19:11-13 **k** 9:10 Hi 3:1, 10:1 **l** 9:12 Lev 16:3,14-16; Hi 10:4; Nam 19:9,17-19 **m** 9:13 1 Pi 1:18-19; 1 Jo 1:7; Hi 6:1 **n** 9:14 1 Ti 2:5; Hi 8:6

nogofalasi ma sagagi'manai, esis sofa' ambal alamba namili sogape andeande' lifilafi dondol. Amamba ambal namili si'i fowa' God naga'i endilisi atisa sogofa'ami.

¹⁶Epen mamahina okom mondanda' niga'i basef ifimba banagafi ma epes mamahisa anaf sogofa' hiahawes ananisii afamba anin nigaga'afi, nanda' basef ifimba lapafi fail anop okwatip. Ama nogamana ananinai ni'i nigaila basef ifimba ma nogofa' hiahawes ahamanai, dao' anen nili' nindihimba'mas endilisi ma ahamana ananinai naga' ea'. ¹⁷Dei' main, i'i ahamana nogaga', basef ananifi lapafi nanda'ef fagape okwatipi fape banagef fandawalap. Apa' i'i anen ata' nogape namona, basef ifimba ina dei' banagef, owa'. Ata' pupulif. ¹⁸Isimba atis basef ifimba fowa' God nagala' lapafi owa' fetaga fendawalap dowafa. Amom maha mafis makolo' esimbel amamimbeli bewa' banaga basef ifimba, dao' fape banagef fandawalap alihif.^o ¹⁹Moses fowa' nali' na'ipa esis amam nematawa Juda hiasi basef hiafi ma mu'uli Godi hi'alef, ama main, nofa' esimbel bulmakau nogami baloma memei baloma embel baloma awif sipsipif akwahimi maloma lawag sa'uni saga'i hisopi agufugama nalam dis esimbel ambalemba bagalasi nuwali'ambela amam nematawa isimba hiasi saloma buk akwamba mu'uli inimba Godi nagapau'wi wapani.^p ²⁰Ea' na'i, "Esimbel ambalemba begewa' banaga basef ifimba God nagala' lapafi, ifimba na'ipipaefa pigailifi."^q

²¹Moses nowali' esimbel na'amba atin bail ipat anamba sanda' lotuwanai naloma hiahaom amamba hiami hi'alam sanda'am sanda' lotumanam God ipat anamba nomoni.^r ²²Basef ifimba ma mu'uli inimba fa'i felefele'ma hiahawes isimba hiasi hi'igalas a' mosa'opas esimbel atembela sogataga bo'wes hilili'. Apa' i'i esimbel owa' biliwia, God ina nokwaha waf awafi epes sanda'afi, owa'atin endilisi.^s

Krais nondolalima anen atona nali'amona waf awafi epesi

²³Ipat anamba naloma hiahaom amamba sondolali sanda' lotuma Godami, amamba mondola'waifa hiahaom amamba endilisimi magape heveni. Mu'uli Godi na'i hiahaom amamba itapami motaga bo'om hilili'ma esimbel ambalemba atembel. Apa' hiahaom amamba endilisimi magape ilifi mikila' amamba itapami. Isimba atis dei' God na'i hiahaom amamba endilisimi magape ilifi a' mondataga bo'om hilili'ma esimbel dambaimbeli bigikila' esimbel fowa'imbeli.^t ²⁴Apa' Krais ina nawis ipat anamba Godi epes sagala'ana lagufi, nondola'waifa ipat anamba endilisinai nagape ilifi, owa'atin. Anen nafe' nawis heven atogon, anamba dei' nataga alihina nape atapina ma naep Godi nandabeten nagatopalopapa.

o 9:18 Eks 24:3,6-8; Lev 14:4,6 p 9:19 Eks 24:8 q 9:20 Lev 8:15,19 r 9:21 Lev 17:11; Ef 1:7 s 9:22 Hi 8:5, 10:1 t 9:23 1 Jo 2:1

²⁵Nemaf atetef afagof danda pris dembinai nape nagali'ma pris hiamii itap apa'e nofa' esimbel mafisi nawis nomon nondolali ma God. Nawis nomon ganimba wa'ol nagape atina saga'i bo'wagon a'owa'ma. Esimbel ambalemba ina' a' ananibeli ma alop ananipi, owa'. Apa' Jisas ina nawis nomon naso' anen atona nondolalima God afagof danda si'i amom pris manda'am, owa'atin. ²⁶I'i anen nonda'am na'ambaiai, anen a' nofa' akafimi nimaguf hiafi timbi tambel fowa' dambadamba God nanda' itap apa'e nifi'i notaga dei'. Apa' owa'atin. Apa' dei' felefele'ma nogota ahi'igalata Krai nataga itap apa'e ma nagaso'ana anen hi'agalana nondolalima Goda nogokwaha waf awafi apa' epesi. Nanda'am nemaf atetef ea' ma'um.^u ²⁷Epes hiasi hi'ilas anaf sog'a' atetef owagama sulutuma basef lu'wafi God nonda' kotimasafi. ²⁸Ea' na'amba atin si'i Krai naso'ana anen hi'agalana nondolalima Goda nemaf atetef nagakwaha waf awafi epes hiasii. Anaf wapani nigi' notambel nifi'i. Apa' anen ina nifi'i ma nogakwaha waf awafi, owa'. Nifi'i ma nogofa' epes isimba sape sogohafanai.

Hiahawes gwa'aisi mafis mais apisi mondolalima God magaso'anasi, isimba ina a' la'ifisa sogakwaha waf awafi, owa'atin

10 ¹Apa' mati mu'uli God nagaso' Mosesani nondola'waif dowafa hiahaom bu'wami ma'i anaf migi' mogatagai. Hiahawes isimba apisi ina endilisi, owa'. Isimba sondola'waif dowafi. Ea' dei' mu'uli inimba na'i esis ata' sondolalima God afagof danda ani, ina la'ifina nisindi'amona esis sogafi'i felefele'ma God sondagalamana ma sogataga bo'wes endilisi, owa'atin.^v ²I'i mu'uli inimba nenda'as be'es endilisiai, dei' ina ata' sondolalima God wapani, owa'. Apa' owa', owa'atin. I'i esis sifi'i sonda' lotumana asotaga be'es sondolalimana atinai, malogof fagape opalef esis nomoni ina fihimba'masa waf awafi asasifi, owa'. Apa' owa', owa'atin. ³Afagof hiagufi danda hiahawes mafis mais sondolalima Godasi sagasa'ma ukup asasipi ma sogogawa waf awafi asasifi atapif fapomas.^w ⁴Esimbel bulmakau noganai baloma memei ina la'ifima mogakwaha waf awafi esis sanda'afi, owa'atin endilisi.^x ⁵Ea' afamba Krai nagafi'i itap apa'e anen na'ipa God na'i,

“Ina' nandaiwa'ma esis soha mafis sofa'ai hiahawes mais sifi'i sondolalima ina', owa'. Apa' ina' nandondomba anop alopa negase'eap ae'. ⁶Mafis saham saga'atama sondolalima ine'ami maloma hiahawes mafis mais sondolalimamenasi ma negakwaha waf awafii, amambai ina' nandaiwa'mam. ⁷A'i owa' main a'i, 'God, ina' dei' netolowe. Si'i fowa' amom profet manda' basef fail buk faga'iasa ae', dei' ea' afi'i ma igaila okom ine'imi atom.’”

^u 9:26 Fl 3:20; Hi 10:10; 1 Pi 2:24 ^v 10:1 Hi 8:5 ^w 10:3 Hi 9:13 ^x 10:4 Sam 40:6-8

⁸Krais nali' ata' na'ipa God na'i, "Ina' nandaiwa'ma mafis mais saham sanda'am sandolalima ina' belita sondolalima ine'atai. Mafis maim amamba sondolalima ine'mami ma negakwaha waf awafii, amambai ina' nandaiwa'mam."

Apa' owa' mu'uli God nagaso' Mosesani na'i esis sondolalimana atin sondape atapis. ⁹A'i owa' main, Krais nagi' na'ipa God na'i, "Ina' natolowe. Ae' afi'i ma igaila okom ine'imi atom."

Ea' dei' God natofa mafis maim fowa'imi magali'i sondolalimaminami. Apa' dei' nahapona waf afamba Krais nagaila okom Godi atom fape banagef faha'ofa amamba fowa'imi.^y ¹⁰Jisas Krais naila okom Godi hi'alam datima naso'ana alop ananipi nondolalimana nemaf atetef ea' ma'um. Isimba atis dei' nanda'apa mataga ananipai atepa be'epa hilili'.^z

¹¹Amom pris hiami hi'alam malutu manda' maol nimaguf hiafi danda. Amom mondolali ma God ea' manda' inimba atin nimaguf hiafi timbi tambel. Apa' owa' ofa inimba ina banagen nakwaha waf awafi, owa'atin. ¹²Apa' aman anamba nondolali atetef, nagaso'ana anen atona nondolalima Goda negakwaha waf awafi, amamba atom atapim mope dondol lifilafi. Anen nanda'am na'amba ma ea', dei' nape naloma Goda wa'ol lagol kwahisigili banagagili.^a ¹³Anen nape na'amba atapina nape nasasa nemaf afamba God nonda' bousi ananisi sogafe' lafela anen. ¹⁴Dei' main, Krais naso'ana alop ananipi atop God nondolalimana nemaf atetef, ea' amamba atom nanda' epes sataga bo'wes hilili' sogape dondol lifilafi. Epes isimba anen dei' nape atapina nanda'as anaf sogataga bo'wes hilili'. ¹⁵Ea' Ambal bu'unai Godi wapani nawalapa basefa apa' na'amba nali' na'i,^b

¹⁶"Dembina' na'i, nogota atamba ata' hi'ilata tili',
ma main dao', ae' enda' anif basef lapafi elomas. Basef ifimba
na'amba. Anaf atiasi ae' a' enda' mu'uli ae'ani hiani nepe nelelemb
asasilimbi ea' enda'an nil ukup asasipi."^c

¹⁷Ama main nagi' nowatani basef ifimba na'i, "Ae' dei' ina atiasi mondanda'ma awami asasimi moloma waf awafi esis sanda'afi, a' owa'atin."

¹⁸God nokakisa waf awafi nakwahef ea'. Dei' maol inimba sofa'ai mafis mais sondolali ma Goda waf awafi a' owa'atin endilisi.^d

Apa' mohapifana endilisi mondafef' felefele'ma God

¹⁹Ea' dei' ipa' alipipai, esimbel Jisasi atembel dei' apa' ukup banagep. Ea' owa' ombel mohapa ma mofe' mugawis nomon anamba God nagapoma bo'wagoma hilili' a'owa'ma.^e ²⁰Apa' dei' ilama mofe'

^y 10:9 Hi 9:12,28 ^z 10:10 Eks 29:38 ^a 10:12 Hi 1:3; Sam 110:1 ^b 10:15 Jer 31:33; Hi 8:10 ^c 10:16 Jer 31:34; Hi 8:12 ^d 10:18 Hi 4:16 ^e 10:19 Mt 27:51; Hi 9:8

mugawis anamba ufiaw akwamba dambai'wi ambal namili'wi. Ufiaw akwamba Jisas atona nawala lowaf anamba lu'unai nogotaol si'i utai nandogwa'w kwagal nawis nomon. Lowaf anamba alop ananipi atop.²¹ Dei' apa' anona pris dembinai nugumafi amam nematawa Godii. Anamba Jisas atona.^{f 22} Isimba atis dei' apa' mondafi' felefele'ma Goda waf afamba. Apa' mondakwaha waf hiafi baso'afi ma opalef ape'ilifi ea' mohapifana endilisi. Ukup pendapoma Kraisi, anen nuwali' esimbel ananimbeli nelelemb ape'ilimbi ma nogandombaselemb. Malogof fagape opalef ape'ilifi nomoni ina fihimba'mapa fawalogapa ma waf awafi ape'ifi, owa'. Apa' ukup pendapoma anen a' nasa'opa alop ape'ipi embel kalagembeli.^{g 23} Apa' mondahapila hapif ape'ini mundawalapan alihina hiahaom fasimi apa' mape mogohafami. Isimba apa' mondahapilas sisihis, ea' ina mondahagas, owa'i. Dei' main, apa' ea' mogawa, hiahawes mamahisa God naga'i basef endilisifi atifi atiasi nigimif nondas datima.²⁴ Apa' mondasa'ma ukup esis sahin owani, ma ukup pigapigaila esis amam nematawa sonda' waf fasifi.^{h 25} Apa' ina ukup pese'apama waf mondakolas mogaloma esis alipisi si'i anis epes sanda'as, owa'i. Apa' mondowa' banagama atin ea' mondanda'as atin atapis mindikila' fowa' manda'as. Dei' main, ipa' ea' pegawa nemaf Dembinai nogafi'afii a' fafi'i felefele'.ⁱ

Apa' ina mowa' alafugaha nogamana Godi, owa'i

²⁶I'i apa' mogawa basef endilisifi ea' ma dei' apa' mila ukup ape'ipi atipa mofe' monda' waf awafi atapipamaf, i'i monda'as na'amba, ina atiasi a' anin ofa daiana negakwaha waf awafi ape'ifi, owa'atin endilisi.^{j 27}Atiasi apa' ombel mohapa a'owa' endilisi mope mosasa nemaf afamba God nogawaloga apa' ma nosapa'apa mogafe' nif amamba lu'wami a wandafum a'owa'i moga' bousi isimba Godi.^{k 28} Apa' ea' mogawa, epen mamahina nimbisila' mu'uli inimba God nagaso' Mosesani, ma epes bias a'a wanis sitilina sowalapa waf awafi anin nanda'afi, esis ina atiasi siti anin uwahipin, owa'atin. Esis ea' sola'apan sohan negaga'.^{l 29}Dei' ipa' ukup pandame' pa'imama ma epes mamahisa sogowa' alafugaha Nogamana Godi? Epes isimba atiasi sofa' nimanimi lu'wami a'owa' mikila' epen inimba nigimbisila' mu'uli inimba God nagaso' Mosesani. Esimbel Kraisi anol ametala basef God nagala' lapafi fanda' epes isimba ananisi atis bo'wes hilili'i. Owa' epes isimba sanda'as na'amba sa'i esimbel ambalemba Kraisi falafimbeli dowaf, sa'i ga' Kraisi falafini atin. Ea' sanda' basef findiwaefa Ambal bu'unai Godi natopalopapa dowaf nugumafiapai.^{m 30}Dei' main, apa' ea' mogawa epen inimba a' na'i, "Waf pegagwa waf awafiafi, maol ae'ani. Ae'

^f 10:21 Lev 8:30; Esi 36:25; Ef 5:26 ^g 10:22 Hi 4:14 ^h 10:24 Hi 3:13 ⁱ 10:25 Hi 6:4-8 ^j 10:26 Ais 26:11 ^k 10:27 Diu 17:6, 19:15 ^l 10:28 Eks 24:8; Hi 13:20 ^m 10:29 Ro 12:19; Diu 32:36; Sam 135:14

atowe bola egwamasaf.” Ea' na'ias wapani na'i, “Ae' atowe Dembiwai anaf ewawaloga esis amam nematawa ae'asi ma kot basef lu'wafi.”

³¹I'i God banagona nagape namona atapinai nogahapila apa' tatala'ipa ma nogagwamapa waf awafi, amambai dei' ombal lu'wami endilisi mogahepamam kwapati'i.

Apa' mundalutu banagepama hapif

³²Apa' ipa' ukup pendapoma nogata fowa', afamba ipa' pegefa' mogogala'i Godi. Nogota atamba ipa' pefa' nimanimi akafimi lu'wami a'owa'. Owa' owa'atin. Palutu banagepa ma pagali'ama wandafa waf awafi.ⁿ ³³Anif nimaguf sanda'epa palutu naep amam nematawa la'afisa, ea' sanda' basef awafi findiwaefa ipa', sase'epa akafimi nimanimi atom naep asasipi. Ea' anif nimaguf sanda'as na'amba atina anis amam nematawa daias. Ipa' palutu palomas patopalopas.^o ³⁴Ipa' pati esis amam nematawa sagape kalabusi uwahipis pefa' akafimi palomas. Ea' nemaf afamba esis salolo' lagofapa sofa'mepa hiahaom ipe'imi, ipa' sonahepa ma batap tol pagapomas. Dei' main, ipa' ea' pegawa, hiahaom ipe'imi bu'wami endilisi ata' mapomepa amamba anaf mogape atapim dondoli. Amamba mikila' endilisi hiahaom amamba sogofa'mepami.

³⁵Ea' dei' ipa' ina pekwaha waf bu'wafi ukup pagalutu banagepamafi, owa'i. Waf bu'wafi ea' afamba atef, God anaf nogwamepa hiahaom fasimi ma ipa'.^p ³⁶Ipa' pindalutu banagepa ma pigaila okom Godi ma pegefa' hiahaom fasimi fowa' God a' na'iam ea' endilisi ma nogasi'ipami.^q

³⁷Aho', ina ata' nogota laota. Nogota kwasala'uta dowaf, “Ama aman anamba na'i nogafi'i, anen atiasi a' nifi'i. Anen ina atiasi nupani halehale, owa'atin.^r ³⁸Apa' epes fasisi ae'asi kofagema ma sogape namis atapis na'amba. Esis sahapifa ae'. Epen mamahina nendahagasa nekwaha negahapifa ae'i, atiasi okom ae'ami ina bo'oma anin, owa'atin.”

³⁹Apa' ina epes ombel mahapa mandahagas makwaha magahapifa God ama atiasi higilgalapa lamonapai, owa'atin. Apa' epes magahapifanai mofa' ambal namili mogape andeande'i.

Waf kofagefa ma mogohapifa God

11 ¹Waf kofagefa ma apa' mogohapifa God na'amba. Nelelemb ape'ilimbi ea' bahapila hiahawes isimba apa' mahapifana mape mogohafasa anaf sigi' sogotagai soloma anom hiahaom anaf God nogaso'apami. Ea' hiahawes isimba naep ape'ipi owa' mogatilisia, apa' nelelemb ape'ilimbi begawa endilisi hiahawes isimba sape.^s ²Amom

n 10:32 1 Ko 4:9 **o** 10:33 Mt 6:20; Mt 19:21,29 **p** 10:35 Lu 21:19; Hi 6:12

q 10:36 Hab 2:3-4 **r** 10:37 Ro 1:17; Ga 3:11 **s** 11:1 Ro 4:18; 2 Ko 5:7

fowa'imi mahapifana na'amba, isimba atis dei' God na'iam na'i, "Waf amamifi bu'wafi."^t

³Apa' mahapifana, isimba atis dei' mogawa God nanda' hiahaom magape ilif itapi matagama basef ananifi atif. Ea' apa' mogawa hiahaom hiami apa' ea' magatulumi, amamba God nanda'ama hiahaom amamba apa' owa' mogatolom naepia.^u

Waf Abeli Enoki Noa magahapifa God

⁴Abel nahapifa God. Isimba atis dei' nofa'i anis hiahawes nondolalima Godasi be'es endilisi sikila' hiahawes Kain nondolalima Godasi. Aho', Abel nahapifa God, ea' amamba atom God na'i anen epen bo'ona hilili'i. God na'i aho'ma hiahawes Abel nondolalimanasi na'i hiahawes isimba fasis. Abel naga' ea', apa' waf ananifi nagahapifa Godafi si'i malogol ata' fihimba'mapa waf bu'wafi atapina nape.^v

⁵Enok nahapifa God ea' dei' God nofa'ana nafe' nalota heven. Anen ina nape naga', owa'atin. Epes sala solaomana sa'i sogati anini, apa' ina satolona, owa'. Dei' main, God nofa'ana. Isimba na'amba atin si'i buk Baibel naga'ias na'i,

"Fowa' God ata' owa' nofa'anaia, nogota atamba Enok nali' naila okom Godi."

⁶Epes owa' sogahapifa Godia, esis ina atiasi sila okom Godi, owa'atin. Dei' main, i'i epes ami si'i sogafe' felefele'ma Godi, esis sohapifa God sondogawa endilisi anen nagape namona atapinai. Ea' sohapifana ma nogaso'as hiahaom bu'wami epes isimba sala sogolaomana banagambili.^w

⁷Noa nahapifa God dei' nihimba'mana basefa hiahaom anaf migi' mogatagai, hiahaom amamba anen owa' ata' notolom nogogawamia. Anen nail basef Godi nanda' ano'w galaho'w lu'wakwi. Galaho'w akwamba Noa nao'wa ako'w awasi ananisi safe' sawis sagapau'wi sape andeande', ina awes, owa'. Anen nahapifa God. Isimba atis si'i nanda' kotima esis amam nematawa sagape itapi hi'alas. Anen nahapifa God. Isimba atis ea' nofalana na'i aman bo'ona hilili'i, si'i nanda'masas epes isimba hiasi mamahisa sagahapifa anini.^x

Abraham

⁸Afamba God nofala Abraham nokwaha wambel ananimbili nogafe' itap anaf anen na'i nogaso'anapi anen nahapifana. Isimba atis nail basef Godi nafe'. Anen ina nogawa anamba nogafe'ma, owa'. Apa' anen nahapifana atin dei' nafe'.^y ⁹Anen nahapifana ea' nafe' nape itap apamba

^t 11:2 Jen 1:1; Sam 33:6; 2 Pi 3:5 ^u 11:3 Jen 4:3-10 ^v 11:4 Jen 5:24 ^w 11:6 Jen 6:13-22; Jen 7:1; 1 Pi 3:20; Ro 3:22, 4:13 ^x 11:7 Jen 12:1-5; Ap 7:2-4 ^y 11:8 Jen 26:3; Jen 35:12,17

fowa' God na'i endilisi atis na'i nogaso'anapi. Anen nape itap apamba si'i anen anota wambotai. Nape ifagw seligwi naloma Aisaki Jekop, amom biam anaf mogofa' itap apamba mogalomanai, si'i fowa' God nali' naga'i basef ifimba lapafi. ¹⁰Dondol Abraham okom ma'i ata' niti wambel taun inimba pohawa mais banagasini wambel banagambili gani ilif. God atona gawainai anen okom mandanda'ma nonda' wambel ambalemba, ea' nanda'ambel.^z

¹¹Sera ako'w asa'w ea' ina kola awasi, owa'atin. Nogota kogola awasiatai ea' tafe' hi'alata. Apa' owa' ako'w kwahapifa God. Isimba atis dei' God nanda'akw banage'wa kogola awani. Dei' main, ako'w kwahapifana endilisi ma basef anen nagala' lapafi, kwa'i anen atiasi nigimif nonda'as datima si'i naga'if.^a ¹²Ea' dei' aman anamba atotona, anen ea' hagona felefele'ma nogaga', ea' nataga ahama awasi afe'usi hiasi a'owa' anaf sigi' sogatagai. Esis sataga hias a'owa', sondahama ondowa wagape ilifi, waloma ko'onaga goga'oh naoh akatai. Epes ina la'ifisa sigiambas, owa'atin.^b

¹³Epes isimba sahapifa God atapisa sape safe'ma sagaga'i. Ina sali' sofa' hiahaom fasimi amamba God na'i endilisi nogaso'asami, nemaf afamba sagape, ata' owa'atin. Esis sahapifana endilisi salutu laogon sandagalam si'i sagatolom ea'i. Ea' sawalapa basef sa'if sa'i, "Apa' mape itap apa'e si'i epes analemb walimbi. Apa' mafi'i mape nogota bandata itap apa'e."

¹⁴Epes saga'i basef ifimbaii, apa' ea' mogawas, sa'i sowando'ma itap asasipi si'ip. ¹⁵I'i ukup asasipi ata' pape pandanda'ma wambel ambalemba fowa' sakwahembel sagafi'iai, dei' esis ata' ufia'w kwagala sotambel sogafe'agon.^c ¹⁶Apa' dei' esis ina sanda'as na'amba, owa'atin. Nelelemb asasilimbi behafema anep itap daiap, fasifasip a'owa' pikila' anamba fowa'igima. Anamba anen heven atogon. Isimba atis dei' God ina ambal aola epes isimba saga'i, "Ina' God apa' manda' lotuminai," owa'atin.

Anen nandomba anambel wambel taun ea' ma epes isimba sagahapifanai sofe' sogapaogon.^d

¹⁷Abraham nahapifa God a'owa' ma basef ifimba nala' lapef nagalomanae'fi. Ea' dei' God nagwamba Ebrahama nogaso'ana Aisak nondolalimana ma God. Endilisi, Abraham nape nasasama noha nogamana ananinai nondolalimana. ¹⁸Apa' owa' God nali' na'ipana na'i, "Esis wambota Aisaki atis anaf sofa' agol wambota ine'isi."^e

¹⁹Abraham okom mandanda' na'amba na'i, "I'i ae' egahana afunama, ea' hapainai, bola God nogasa'mana wapanii."

^z 11:10 Jen 18:11-14; Jen 21:2 ^a 11:11 Ro 4:19; Jen 15:5, 22:17; Diu 10:22 ^b 11:12 Jen 23:4; 1 Kro 29:15; Sam 39:12; 1 Pi 2:11 ^c 11:15 Eks 3:6,15; Mk 12:26 ^d 11:16 Jen 22:14; Ro 9:7; Je 2:21-22 ^e 11:18 Ro 4:17

Ea' dei' apa' mi'ias mi'i isimba si'i God nasa'ma Aisak notambel nosafili matmat wapani ma Abraham notambel nogofa'ana."^f

Aisaki Jekop maloma Josep

²⁰ Aisak nahapifa God. Isimba atis dei' nofalo'ma Jekopi Iso nowa' banagama hiahaom fasimi na'i anaf mogatagamai.^g

²¹ Jekop nahapifa God, ea' dei' afamba felefele'ma na'i nogaga', nofalo'ma nogaopana Josepi biam nowa' banagam. Anen nandahi'amon nasisil nindiwa balaga nandagalama God.^h

²² Josep nahapifa God. Isimba atis dei' felefele'ma na'i nogaga' anen na'i basefa anaf esis Israel sokwaha itap lu'upa Isip sogafe'. Ea' na'ipasa sogawa bihitagof alop ananisi wandof.ⁱ

Moses

²³ Mamasana Mosesi sahapifa God. Isimba atis dei' ma'mana kolana ea' sambaho'wana atin nape aomb wanemb. Dei' main, esis bias satolona fasifasina a'owa' endilisi. Esis ina ombal mahasa King dembinai Fero ma mu'tuli ananini, owa'.^j

²⁴ Ama main, Moses nataga dambena, nahapifa God. Isimba atis dei' okom mandanda' nandaiwa'ma esis sofalana siga'i nogama nemata'w akwamba King Fero nogamana, owa'. ²⁵ Na'i nondofa' nimanimi na'amba atin nondaloma esis wambota atota Godi. Nandaiwa'ma nogaila waf awafi ma nope nondagala nogota atamba bandata.^k ²⁶ Anen okom mandanda' ma'i i'i anen nogofa' ambal awali ma agol Kraisi, amambai a' fasimi endilisi mikila' moni hiani naloma sosaf fasinai hiana haona esis Isipi. Dei' main, anen okom mapoma hiahaom amamba fasimi a'owa' anaf God na'i endilisi nogaso'anami.^l

²⁷ Moses nahapifa God. Isimba atis dei' nohafel nakwaha itap lu'upa Isip. Anen ina nandafa'ma okom wandafunai King Feroi, owa'atin. Anen si'i nagati aman anamba esis owa' la'ifisa sogatolona naep asasipia. Ea' dei' nape banagona.^m ²⁸ Anen nahapifa God dei' naila basef ananifi ma gwa'aisi isimba lu'wasi Pasova, naha sipsip nanda' lotuma God. Ea' nuwati' esimbel bail utagw ilifa wa'owa'ol afamba ensel anamba nogaha awasi amam esis Isipi ina atiasi noha esis Israeli, owa'.ⁿ

Esis Israel hiasi a'owa' sahapifa God banegas

²⁹ Esis Israel sahapifa God. Isimba atis dei' satopa' naoh agiligwa Embel Akwahimi mandahagas momba' monafa ea' safe' akata si'i itap

f 11:19 Jen 27:27-29; Jen 27:39-40 **g** 11:20 Jen 48:15-16 **h** 11:21 Jen 50:24-25; Eks 13:19 **i** 11:22 Eks 1:22, 2:2 **j** 11:23 Eks 2:10-12 **k** 11:25 Hi 10:34-35 **l** 11:26 Eks 12:51; Eks 14:13,14; Ro 1:20; 1 Ti 1:17; Hi 11:1 **m** 11:27 Eks 12:21-30 **n** 11:28 Eks 14:21-31

fatauguma. Ea' esis Isip sati esis salutu la'afen, sagi'mas safe' owa' embel betanima bandahapima baofanas ea' bahas saga' lamonas hi'alas.^o

³⁰Esis Israel sahapifa God, isimba atis dei' safe' sanogama indalelemba sanda' otamba sanda'ami wambel Jeriko tulif sail wik si'igai, nimaguf 7-pelaif, ea' indalelemb ambalemba guligatam mowa itap.^p

³¹Nemata'w akwamba kwanda' so'a waola amami Rahap, ako'w kwahapifa God. Isimba atis dei' amam biam mandambaho' mafi'i magatologini kumafiam andeande'. Ea' dei' ako'w ina afu'w kwaloma epes isimba wambelisi sogosambala Godii, owa'atin.

³²Apa' dei' ae' ata' iwatani basef mamahifa wapani? Owa'atin. Nogota ina laota ma ata' iga'i basefa Gideon, Barak, Samson, Jepta, Devit naloma Samyuel maloma amom profet, owa'.^q ³³Amom amamba, magahapifa Godi. Isimba atis dei' malutu banagem mikila' wandaf matalogofa soldia amom king dembami hiamii. Mape dembami mumafiasa waf usi'ifi ea' mofa' hiahaom bu'wami God na'i nogaso'amami. Ea' masopama malogofa mafis amamba laion wandafumi lu'wami.^r ³⁴Ea' mahefa nif lu'wafi faganda'ef. Amom mafa' mafe'ma bainagw mindihi'amam ea' ina mapisilam, owa'. Amom mape pupulim ama main, owa' mofa' banagami. Ea' mataga banagem endilisi ma wandaf matofa amom soldia hiami misi'ah esis anota wambotai.^s ³⁵Anom amam ea' magaga'i motambel mosafel wapani, mamamam amamuwai watolom wao'wam. Anis epes sanda' kalabus ea' esis bousi sahabombaga alop asasipi endilisi a'owa', felefele'ma sogaga'. I'i esis sigaila basef asasifima, bola sokwahis sefe' wahifis. Apa' owa', esis ina saila basef asasifi, owa'atin. Esis ukup papoma anaf sotanima sogosafel matmata sogofa' ambal namili, na'ambai andeande' a'owa'.^t ³⁶Anis sofa' nimanimi ma esis bousi sa'i basef findiwaifi ma esis, sahas kwapete'as. Ea' anis, sowa'as sen sanda'as sape sanda' kalabus.^u ³⁷Anis, bousi sakwaha otamba sahas afis. Ea' anis, sanda'as kwapete'as endilisi. Anis sofa' so satopa'as alop asasipi biafis atis. Ea' anis, sahas bainatagw saga'.

Ea' anis sagahapila Godi sowaho' alop mafis sipsipi memei si'i luwaguf safe'. Esis a' hiahawes hiasi akasa alop asasipi. Ea' bousi sanda'mas waf awafi endilisi saso'as nimanimi. ³⁸Ea' dei' safe' safe' ganigani sandambaho' itap wafigima epes akagoma. Anis sandambaho' halafutagw, anis sandambaho' otamba lu'wami magal magawis nomoni, a itap fagagatagoma. Esis amam nematawa fasifasis a'owa'i. Isimba atis dei' epes itapasi ina bo'wesa sope sogalomas, owa'atin.

³⁹Epes isimba hiasi hi'alas sagahapifa Godi. Isimba atis dei' sofa' agof fasigufi ma naep ananipi. Apa' esis ina dei' sofa' hiahaom

o 11:29 Jos 6:12-21 **p** 11:30 Jos 2:1-21; Jos 6:21-25; Je 2:25 **q** 11:32 Dan 6:22

r 11:33 Dan 3:23-27 **s** 11:34 1 Kin 17:17-24; 2 Kin 4:18-37 **t** 11:35 1 Kin 22:24-27; Jer 20:2, 37:15; Jer 38:6 **u** 11:36 2 Kro 24:21

amamba fasimi fowa' God na'iam ea' na'i endilisi nogaso'asami, ata' owa'atin. ⁴⁰Dei' main, fowa' gani God okom mandanda' nandondomba anom hiahaom fasimi a'owa' ma apa'. Hiahaom amamba mikila' hiahawes esis fowa'isi sagahapifanai sa'i sogofa'asi. God nanda'am na'amba ma anaf esis sotaga be'es endilisi sofa'am sogalomapa.

Apa' miti Jisas naep do' pilana ea' mohapifana

12 ¹Dei' apa' si'i main? Esis epes fowa'isi sagahapifa Godi salutu salipapa si'i ilagw lu'wami maso'alepa magala'ambemapa sihimba'mapa waf sagahapifanafi. Isimba atis apa' dei' mondakwaha hiahaom amamba manda' apa' nimanipai, moloma waf hiafi awafi fagawasi'apai. Ea' mondowa' banaga nelelemb ape'ilimbi ma mosagih banagambel mondololai'ma sagih bu'wani inimba God nandandepana mugasagihani. ^v ²Naep ape'ipi pelele' do' pindati Jisas atona anen kofagonama hapif ape'inii, nowatanian netaga andeande'ma mohapifana banagepa atapipa mogape. Fowa' anen okom mapoma dagala anaf na'i nogofa'ani, dei' nalutu banagona. Ea' nofa' lawag usi'igai ti'wanaegai naga'. Anen okom mapoma atiasi nofa' akafimi lu'wami nogaga' lawag agamba, isimba falafisi atis. Anen ina ombal mahana ma ga' inimba, owa'atin. Ea' dei' nape felefele'ma sia Godi lagol kwahisigili nape banagona.

God naso'apa nimanimi apa' ma nogasindi'amonapa

³Ipa' ukup pendanda' andeande'ma akafimi amamba fowa' nogofa'ami. Epes isimba sanda' waf awafii sowa'ana alafugah Jisas endilisi sanda'ana kwapete'ana. Owa' anen nalutu banagona a'owa'. Ipa' ukup pendapoma isimba ma ina pupulipa ala'uta tehepa, owa'i. Pendape banagepa. ⁴Ipa' papa' paloma waf awafi ma pagatalagofaf, apa' ipa' ina dei' papa' pafe' patagama wandaf lu'u'fa sahepa esimbel kolo'walambalepa paga', ata' owa'atin. ^w ⁵A'i ipa' ukup pase'epa ma basef ifimba God nanda'efa ipe'i ma nefela ukup ipe'ipi nogowa' banagaipa? Anen dei' nofalepa batawis ananipai, na'i,

“Awasi ae'ipai, nemaf mamahefa Dembinai nogase'epa akafimi ipe'ma nogasindi'amonepama, ipa' ina pi'i akafimi amamba anen nagase'epami falafumi, owa'. Nemaf mamahefa ni'i nogase'epa nimanimi ma nigasindi'amonepa, ukup ipe'ipi ina iwanip, owa'i. ^x ⁶Dei' main, epes mamahisa Dembinai okom mogamogailas a'owa'i anen nanda'as na'amba atina sonda' waf ananifi usi'ifi. Ea' epes mamahisa numafias niga'i awasi ananisii,

V 12:1 Hi 1:3; Ro 7:21; 1 Ko 9:24-25 **W** 12:4 Pro 3:11-12 **X** 12:5 Re 3:19

nahasa nogasindi'amonasa waf usi'ifi wapani ma sogawaf andeande' sogailaf.”^y

⁷Nemaf mamahefa akafimi lu'wami mogatagamepa, ipa' pindalutu banagepa pi'i aho'ma God nogasindi'amonepa. Anen nonda'mepa waf afambai si'i awasi ananisi. Dei' main, ahapa awasii ina mape matitilisi sanda' waf awafi, owa'atin. ⁸Ahapas hiami masindi'amonasa same' basef silifa sogape andeande'. Apa' i'i ahamepa owa' nisindi'amonepaea, ipa' ina awasi ananipai endilisi, owa'atin. Ipa' si'i pagataga dowafa amam hiamii. ⁹Ipa' ukup pendapoma anif basef wapani ifimba. Apa' itapapai hiapai hi'alapa ahapapa ape'imi masindi'amonapa ea' manifelom masa'ma agof amomugufi. Isimba atis dei' apa' andeande'ma mogafe' lafela Ahamapa nagape ilifi numafi ambagof ape'igufi ma mogofa' ambal namili. ¹⁰Amom ahapapa ape'imi itapami, masindi'amona waf ape'ifi nogota bandata dowaf, mandahama ukup amamipi. Apa' God nasindi'amonapa ma nogatopalopapa endilisi ma mogofa' waf bu'wafi ananifi atef hilili'i.^z ¹¹Ahamapa naso'apa akafimi ma nagasindi'amonapa, afamba apa' ina mandagala, owa'atin. Ukup ape'ipi iwanip a'owa'. Nahapa nasindi'amonapa ma nonda' hiahawes fasihi sogatagamapa. Hiahawes isimba na'amba. Atiasi monda' waf bu'wafi atef usi'ifi, nelelemb ape'ilimbi sa'ombel.^a

Apa' mundalutu banagepa dag

¹²Ipa' sa'ma lagof ipe'igufi dowagof ama gigisilimb banagelemba penda' maol Godi. I'i nembawa bo'wagah ipe'igahi akepigah hokwaepa, ipa' dowagah mehipe' ea' pilutu banagepa dog.^b ¹³Ipa' penda' ufiaw ipe'ikwi usi'ikw kofe'. Ama atiasi epes bo'wagah aogahisi ina awes hi'ilas, owa'atin. Atiasi sogataga be'es wapani.^c

¹⁴Ipa' dei' pendanda' maol banagambela pigaila waf opalef fegape sa'ombel pegaloma epes hiasii. Ea' pindaila waf afamba usi'if hilili'i, pegape Dembinaii atipa si'ipa. Epen waf afambai akani, anaf anin ina niti Dembinai, owa'atin.^d ¹⁵Ipa' solawaipa andeande'. Na'amba anin alipini ipe'ini newa ma waf awafi nelelama God nagatopalopapa dowafa nowambilapai magape andeande'. Na'amba anin alipini ipe'ini nenda' waf awafi si'i lawag augai gail gogola gwa'aisi numbutisii, ea' nese'epa nimanimi ipa' nenda' ipa' hipai petaga awepa ma naep Godi.^e ¹⁶Na'amba anin epen atitin nila waf awafi so'a waulafi. Ipa' solawaipa andeande'. Na'amba anin epen atitin nese'ana alafuga God si'i fowa' Iso nanda'asa nagatala gwa'aisi nogota bandata, ea' nakwaha hiahaom bu'wami ahamana nandondombam magapomanai.^f ¹⁷Ipa' pegawa, anen na'i notambel nefe'ma

Y 12:6 Diu 8:5; 2 Sml 7:14 z 12:10 Je 3:17-18 a 12:11 Ais 35:3 b 12:12 Pro 4:26
c 12:13 Sam 34:14; Ro 12:18 d 12:14 Ap 8:23 e 12:15 Jen 25:33-34 f 12:16 Jen 27:30-40

nogofa' hiahaom amamba bu'wami owa', God na'i owa'atin. Iso nanda'am lef atin napoma nogofa'i hiahaom amamba, owa' a' owa'atin. Ufia'w akana ma notanima nombema nembel nogowa' alafugama waf awafi wapani.^g

Apa' mataga ea' ma halafuta bu'utai Saion

¹⁸Dei' ipa' ina pataga pape felefele'ma anis maefah patilis pagahapilas lagof ipe'igufi, si'i halaf afamba Sainai, owa'atin. Halaf afamba nif lu'wami, a owamb akot alialinai endilisi a fufin lu'unai banagonai,^h ¹⁹a alof nogogali, a anagol malogol gaga'i basefi. Esis amam nematawa Juda sagama' malogol agalemba ganda' basefi, esis ombal mahas sa'ipa Moses dindinip na'amba sa'i, "Apa' mandaiwa' ma mogame'ana wapani."ⁱ

²⁰Dei' main, esis ombal mahas endilisi a'owa' ma basef ifimba God nagaso'asef esisi. Anen naga'i na'amba na'i, "Ti anin epen o anin mafin ami nefe' negatolasa halafuta atambai, andeande'ma esis sogahan otamba ma negaga'."^j

²¹Esis ombal mahas kwapete' endilisi ma hiahaom amamba sagatolomi. Hiahaom amamba lu'wami a'owa' manda' Moses ombal mahana kwapete'a nogatolom. Ea' na'i, "Ae' bolale kwapete' ombal mahe ma egatolom."^k

²²Ipa' ina pataga hiahaom amamba, owa'atin. Ipa' ea' pataga halafuta Saion, wambel lu'wambili taun God nagape namona atapinai. Anamba Jerusalem dambaigima nagape heveni. Ipa' patagama ensel hiami hiami a'owa' mandatama mape mandagala.^l ²³Ipa' pafi'i pandakolas paloma epes Godi, awasi ananisi sagali'i. God nanda' agof asasigufi fape wambel ambalemba ilif. Ipa' pafi'i felefele'ma God, anen jas dembinai nowalogas hi'igalasi naloma ambagof epes fowa' God naga'i be'es hilili'i.^m ²⁴Ea' pafi'i felefele'ma Jisas, anen nagape la'afen nugumafi basef lapafi dambaifi. Ea' pafi'i esimbel ananimbeli fowa' nuwali'ambela ipa', nogowa' banaga basef ifimba lapafi. Esimbel ambalemba bawalapa ano'w ufia'w bu'wakwi a'owa'. Basefa ufia'w akwamba fikila' a'owa' basef Ebeli. Dei' main, basefa esimbel Ebeli fefala Goda nogagwa waf awafi. Apa' esimbel Jisasi atembel God nakwaha waf awafi okom maso'anaf.ⁿ

Apa' solawaipa andeande'

²⁵Ipa' solawaipa andeande'. Na'amba pewa' alafugaha aman anamba dei' naga'ii. Fowa' gani itap apa'e God naso'asa banagafi endilisi esis amam nematawa, owa' sosambala basef ananifi. Fowa' nogota tatumba sogosambalif, ina la'ifisa sofa' sofe' sindihi'ama okom wandafunai Godi,

g 12:17 Eks 19:16-20; Diu 4:11-12 **h** 12:18 Eks 20:18-21; Diu 5:22-27 **i** 12:19 Eks 19:12-13 **j** 12:20 Diu 9:19 **k** 12:21 Ga 4:26; Re 5:11 **l** 12:22 Lu 10:20 **m** 12:23 Hi 8:6, 10:22; 1 Pi 1:2; Jen 4:10 **n** 12:24 Hi 2:1-3; Hi 10:26-29

owa'atin. Fowa' God na'if itap apa'e apa' dei' nape heven na'i basef banagef a'owa' ma apa'. I'i apa mowa' alafugaha anen, anaf apa' wapani ina la'ifipa ma mofa' mefe' mindihi'ama okom wandafunai ananinai, owa'atin endilisi.^o
²⁶Fowa' God nagaso'ana mu'uli ananini Moses, malagol ananigili gakoto'ma itap apa'e. Apa' dei' na'ipapa na'i, "Anaf ae' ikoto'ma itap anef nemaf wapani. Apa' ina ikoto'ma itap atep, owa'. Ikoto'ma itap peloma heven wapani."

²⁷Basef ifimba faga'i, "Anef nemaf wapani," fihimba'mapa na'amba. Hiahaom fowa' God nanda'ami anaf nokoto'mam mefe' higililam hi'ilam. Apa' anom hiahaom fasimi ma poe bu'wani owa' mondokoto'ia amamba banagem mope atapim.

²⁸Isimba atis apa' mundanifela God. Dei' main, dei' apa' mawis God nagala'ambemagoma anamba epes ina la'ifisa sogakoto'magon, owa'atin. Apa' monda' lotumana mondasa'ma agol ananigili ma waf ombal mogohapamafi ma mogaila okom ananiami atom.^p ²⁹Dei' main, God apa' manda' lotumanai, anen a' si'i nif lu'wami fagando hiahaom awami hi'agalam.

Apa' ukup pindapindaila esis alipisi endilisi

13 ¹Ipa' Kristen, ukup pindaima atina sahin owan ipe'isi atapipa.^q
²Ipa' ina ukup pese'epama pegatopalopa esis epes anambel wambelisi sogafi'i ifagw ipe'igwii, owa'i. Ipa' pegawa, fowa' gani anis epes sanda' waf afambai, ma sagatopalopa anis daiasi, esis sofa' anom ensel safe' sumafiam ifagw اساسigwi. Esis ina sogawa sa'i amom ensel mafi'i, owa'. Sa'i owa' epes atis itapasi.^r ³Ipa' a' ukup pendapoma esis alipisi sagape sanda' kalabusi si'i ipa' ea' panda' kalabus pagalomas. Ea' ukup pendanda'ma epes isimba sogofa' akafimi nimaniami alop اساسipii, petopalopas si'i ipa' atipa pegefa' akafimi alop ipe'ipi pegalomas.^s

⁴Ipa' amam nematawa pandaso'ama ea'i, penda' waf afamba fetaga fendape hilili'. Ipa' ina penda' waf awafi alugufi, owa'i. Dei' main, ipa' pegawa anaf God nogwamipai waf awafi ma amam nematawa sanda' waf so'a waulafii, saloma amam nematawa isimba sagahambombaga daso'amaii.^t ⁵Ipa' ina pila waf awafi afamba ukup pegehafela moni a'owa', owa'i. Hiahawes ipa' pagahapilasi, isimba ipa' a' ukup pendanda' na'amba pi'i, "Na'ambai andeande'. Isimba atiasi dondo'ma apa'."

Dei' main, God na'ias na'i, "Ae' ina anaf okom mose'e ipa' ewa'epa alafuga, owa'atin endilisi."^u

⁶Ea' dei' apa' mondowa' banaga nelelemb ape'ilimbi ea' mi'ias na'amba mindai,

^o 12:25 Eks 19:18; Sam 68:8; Hag 2:6 ^p 12:28 Diu 4:24, 9:3; Ais 33:14 ^q 13:1 Ro 12:13; 1 Pi 4:9; Jen 18:1-8; Jen 19:1-3; Jo 13:34 ^r 13:2 Mt 25:36; Hi 10:34 ^s 13:3 Ga 5:19,21; Ef 5:5 ^t 13:4 1 Ti 6:8; Diu 31:6,8; Jos 1:5 ^u 13:5 Sam 118:6

“Dembinaï nagatopalopa ape'i. Apa' ina ombal mohapa, owa'. Atiasi epes la'ifis sonda' maina apa'? Owa'atin endilisi!”^v

Apa' mondaila waf amom agufumi mugumafi esis Kristeni

⁷Ipa' nomonas sondapoma amom agufumi ipe'imi fowa' magawalapa basef Godi ma ipe'i. Ipa' ukup pendanda'ma fe' bu'wani amamini ea' pefe' pila waf amom magahapifa Godafi.^w ⁸Jisas Kraï nape na'amba atin si'i nambati', ea' dei' wapani, ea' nope atapina anaf dondol lifilafi.^x ⁹Ipa' solawaipa. Na'amba anif basef hiafi fafifafi fifi'i felamona opalef ipe'ilifi ea' pekwha ufa'w Godi. I'i opalef ape'ilifi fegape atapilifa waf God nagatopalopapa dowafafi numafiapa magape andeande'i, na'ambaifi andeande'. Opalef ape'ilifi ina banagalefa mugaila mu'uli epesi ma gwa'aimi mamimami, owa'atin. Waf afambai sagaila mu'uli inimbafi ina fatopalopa amam nematawa sagailafi, owa'atin.

Hiahaom God okom maga'iami bu'wami apa' mondolalimanami

¹⁰Apa' anota belita tape sondolalima Goda, atamba Kraï atona naso'ana alop ananipi si'ip nondolalimap naso'anap God. Apa' amom pris mondolalima God ipat atamba selita sanda' lotuwatai, amom ina la'ifima moga' gwa'aisi ma belita atamba, owa'atin.^y ¹¹Pris anamba dembinai nape nagali' ma pris hiamii anen atona nofa' esimbel amamba nawis ipat nomon wa'ol, nagape atina bo'wagon hilili'ma, nondolalima Goda nogakwha waf awafi. Apa' mafis alop si'ina mofa'an mawisi manda' nif maofam ando'ma anamba esis Israel sagapoma.^z ¹²Isimba atis Jisas wapani nofa' akafimi noga' wambel indambel uta ando'ma nagasa'opas nanda'as bo'wes hilili'ma esimbel ananimbeli.^a ¹³Ea' dei' apa' wapani mondafef ma anen indaleleb ando', ma monda' ambagof ape'igufi awagof si'i anen fowa' nagame' ambal aol.^b ¹⁴Dei' main, apa' mogawa itap apa'e apa' ina anambel wambel taun nagape atapini, owa'atin. Apa' dei' mape manda'as mowando'ma wambel taun inimba anaf na'i nigatagai.^c

¹⁵Isimba atis dei' mosa'ma agol Godi lu'wagol mondaso'ana dagala atapina ma agol Jisasi, mondanda'am na'amba si'i hiahaom bu'wami mondolalimanami. Apa' mondolalimana na'amba. Mondaso'ana malogof ape'igufi anen a mogawalapa basefa agol ananigili.^d ¹⁶Ipa' ina ukup pese'epama penda' waf fasifima esis amam nematawa, owa'i. Ea' hiahawes saga'oma ipe'i pendawalogas pese'asa du'wanis epes isimba hiahawes akasi. Dei' main, God okom maga'iaf a'owa'i waf afambai si'i hiahawes bu'wasi ipa' paso'anasa pindalalimanasi.^e

^v 13:6 1 Ko 4:16; Hi 6:12 ^w 13:7 Ef 4:14 ^x 13:8 Ro 14:17 ^y 13:10 Lev 16:27

^z 13:11 Mt 21:39; Jo 19:17 ^a 13:12 Hi 11:26, 12:2 ^b 13:13 Hi 11:10,16; Hi 12:22

^c 13:14 2 Kro 29:31; Sam 50:14,23; Hos 14:2 ^d 13:15 Fl 4:18 ^e 13:16 Esi 3:17; 1 Te 5:12

¹⁷Amom agufumi ipe'imi, ma'i motopalopepa, ea' mumafi ipa' dondol. Ama anaf amom mogawalapa basefa Goda maol hiani manda'ana mugumafi ipe'ani. Isimba atis dei' ipa' pindaila basef amomifi ea' pendape lafelam. I'i penda'mamas na'amba ma amom sonohama monda' maol inimba ma ukup amamipi ina iwanip melef atin, owa'atin. I'i amom monda'an mogaloma ukup iwanipi, amambai atiasi ina motopalopepa, owa'atin endilisi.^f

Beten bu'wani ma mondatopalopa atin

¹⁸Ipa' pendabetena God nogatopalopa afa'. Afa' ogawa malogof fagape opalef afa' nomoni fihimba'mafa wape usi'ifa andeande'. Ea' dei' wa'i ofe' waf usi'ifi hilili'afi nimaguf hiafi dondol. ¹⁹Ae' okom ma'i a'owa' ma ipa' pendabetena God nogatopalope ma atiasi itanima egafe'mago ipa' kwafalis.^g

²⁰God anen kofagonama okom awaniami. Anen nasa'ma Dembinai ape'inai Jisas nosafel wapani. Esimbel bagalo Jisasi begewa' banaga basef Godi nagala' lapafi fagape atapif dondoli. Esimbel ambalemba atembel Jisas nataga Dembinai numafi esis Kristen si'i nugumafi sipsipi. ²¹Ae' a'i God nowa' banagaipa nese'epa waf bu'wafi hiafi ipa' ma pigaila okom ananiami atom. Ea' a'i anen nonda' opalef ape'ilifi nomon ama mogawalapa waf hiafi fasifi anen okom maga'iafi ma banagami Jisas Kraisi atom. Ea' a'i epes hiasi sosa'ma agol ananigili lu'wagol dondol lifilafi. Endilisi.

Basef anif du'wanif

²²Ipa' alipipai, ae' a'ipipa dindinip, pembe' aligah pendagahembe'ma basef anda'afi ma efela ukup ipe'ipi egewa' banagaipa. Dei' main, basef ifi'i ae' anda'efa ipe'i, ifimba bandemandef.

²³Ae' a'i ipa' pendegawago, esis ea' sakwaha owamapa ape'inai Timoti, ea' ina ata' nanda' kalabus, a' owa'atin. I'i anen nifi'i nogatagama ae' kwafalisa, dao' atiasi afa' biafa ofo'o atin utilipa.

²⁴Ipa' penda'mamago nemaf bu'wafi afa'ifi ma amom agufumi hiami ipe'imi molomago esis amam nematawa Godi hiasi hi'indaldas. Esis Kristen alipisi sagape Italii sanda'mepago nemaf bu'wafi ipa'.

²⁵Ae' a'i God notopalopepa dowaf ea' nope nolomago ipa' hipai nowa' banagaipa. Ea' ma'uf ifimba.

^f 13:17 Ap 24:16; 2 Ko 1:12 ^g 13:19 Sek 9:11; Ais 55:3; Jer 32:40; Esi 37:26; 1 Pi 2:25